

LUKAQ

é Gabú Danglù Laiká

(The Gospel of Luke)

¹ Aróng wó dik é sù Htohpiluq ê, ngamoq chyáng dut lai lò bê hkyô pé lé, sâng-hi mai yhumsing myoq èq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kê to bekô nghut ri. ³⁻⁴ Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghû, náng é matú banshoq tok za kê kat byi râ lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵ Yuda mau má Herut hkohkâm up é u lé, Abiyag hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. ⁶ Haú nhik gi, Yhumsîng Garaí é jep é tará eq htúngtarâ banshoq lé, rago za cháng mù, Garaí Gasâng é hí má dingmán é su nhik nghut akô. ⁷ Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le, ⁹ haú Yhumsîng é noqkuq yhûm ahkaú má namngón hkungga ê wang nyhé râ matú, hká yuq nghut râ lé hkyangjông pé é htúngli eq rajung za byù hkyîn shosé she wú é

hkûn, yhâng chyáng âng ri. ¹⁰ Haû mù yhang namngón hkungga lé nyhê é u lé, shiwa byù banshoq gi, yhumpán má, kyûdûng nyi akô.

¹¹ Haú hkûn, Yhumsîng Garaî é maumang lagyo gi, namngón jung nyhê é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhang, maumang lagyo gi, "Zahkariq ê, hkâgyuq, náng é kyûdung dang lé Garaî Gasang gyo byi bê. Haû mù luî, náng é yhumsîng myhí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghû myhíng byi ra râ nghut lhê. ¹⁴ Yhang gi, náng é matú gabú hpo eq nguingón é hkyô dut berâ nghut lhê. Yhang lé baû lo é yanmai, byù myo myo le gabú lo bùm berâ nghut lhê. ¹⁵ Hkâsu mù gâ le, yhang gi, haú Yhumsîng Garaî é hí má ahko ahkáng wó mù luî, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nû é unghkaû mai yhang, Chyoiyúng Woi-nyí eq byíng nyî râ sù nghut lhê. ¹⁶ Yhang gi, Israelaq yhangzo yhangshû pé myo myo lé, Yhumsîng yhangmoq é Garaî Gasâng chyáng lhing lò nhâng râ sù nghut lhê. ¹⁷ Îwâ pê é myit nhiklhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luî, haú Yhumsîng jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luî, yhang lé tâi ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lú? Ngò le mang byuq bê,

ngâ é yhumsîng myhí le asak ipyat ko bê." ga luî, maumang lagyo lé tâ tâ ri.

¹⁹ Maumang lagyo haû gi, "Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shî tâi kyo aq ga luî, Yhang, ngo lé nhang kat é nghut lhê. ²⁰ Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjîng é yanmai, mù haû dut lo é buinyi jé shoq, nàng gi, nhut jit byuq râ nghut lhê." ga luî, yhang lé tâ tâ ri.

²¹ Haû u, shiwa byu pé gi, Zahkariq noqkuq yhûm ahkaû má haû-í myáng shoq lúng byuq é hkyô lé lánng máu nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haû mù luî, yhangmoq gi, noqkuq yhûm ahkaû má yhang myoqwup shing-rán rajung jung myàng ang bê lé, wú sê yu akô nghut ri.

²³ Ahkuî, Zahkariq gi, hkyangjong jong âng é buinyi ngap jáng, yhûm shut dum taû ló byuq bê. ²⁴ Hau htàng má, yhâng é yhumsîng myhí Elizabet gi, zogûng dut lò mù luî, hká le a htoq e za lhamó ngo hkyap yhúmhaû má lúng byuq ri. ²⁵ Haú hkûn, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luî, shî su dut nhang é dông mai hui sêng pyám byí é buinyi má, Yhang ge é hkyô lé, ngo lé tûn shit bê nghut ri." ga tâi ri.

Yesuq Hku Lé Lô Berâ Gâ É Hkyô

²⁶ Ahkuî, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é,

zomyi gyíng rayuq chyáng nhang kat ri. ²⁷ Zomyi hau é myíng gi, Mariq gâ ri; yhang gi, Dawiq amyû mâ é Yosep gá su èq dúng tô é zomyi nghut ri. ²⁸ Maumang haû gi, Mariq chyáng jé jáng, "Mariq ê, nguínón nyí sháng gaq; Nàng, hkungsô wó nyi ri; Haû Yhumsíng Garai gi, nàng eq rahá nyi nyi ri ò!" ga taí ri.

²⁹ Mariq gi, dang haû lé gyo sing nán mù, shí su gâ é dang gi, haí jung gá naû é nghut lhê lú ga luí, myit maú nyi ri. ³⁰ Haú hkûn, haû maumang lagyo gi, "Mariq ê, hkâgyuq, nàng gi, Garai Gasâng é hí má myoqdong wó bê nghut ri. ³¹ Wú aq, nàng zogûng dut lò mù luí, yuqzo rayuq bau râ nghut lhê. Yhâng é myíng lé gi, 'Yesuq' nghû luí, nàng myhíng byi ra râ nghut lhê. ³² Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhumsíng Garai Gasang gi, yhang lé, yhâng é íchyí íwa Dawiq é hkohkâm tanghkuq lé, byi râ nghut mù luí, ³³ Yhang gi, Yakup yhûm* lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut." ga luí, yhang lé taí ri.

³⁴ Haú hkûn, Mariq gi, "Ngò gi, zomyi gyíng ru nghut ashí, haû gi, hkâsu wó dut râ lú?" ga luí, maumang lagyo lé tû taí ri.

³⁵ Haû maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haû baû lò râ Chyoiyúng sù le gi, Garai Gasâng é Yhangzo ga kó râ nghut lhê. ³⁶ Hau htoq agó, wú aq, náng é amyû suisho baúdung myhí Elizabet

* **1:33** Yakup yhûm nghu e gi, Israelaq amyû lé gâ lhê.

lháng, mang bê le yuqgè zo wun to bê. Ahkuî, zogûng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai Gasang a wó kut é haî le a joq." ga luî, yhang lé tû taî ri.

³⁸ Haú hkûn, Mariq gi, "Yhumsing é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tû taî ri. Hau htâng, maumang lagyo gi, yhâng chyáng mai ló byuq bê.

Elizabet Lé Mariq Ê Huî É Hkyô

³⁹ Hau htâng hkâ-í a myáng má, Mariq gi, Yuda mau bum mau mâ é wà rawà shut hân hân e ló luî, ⁴⁰ Zahkariq é yhûm má wàng mù, Elizabet eq huî nyo lhûm ri. ⁴¹ Mariq é danghtê lé Elizabet wó gyo jáng, yhâng é unghkaû mâ é zoshâng gi, byam chyû lo ri. ⁴² Elizabet le, Chyoiyúng Woi-nyí byíng to mù luî, Mariq lé htê mó èq taî é gi, "Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le hkungsô wó nyi ri ô! ⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lú? ⁴⁴ Wú aq, náng danghtê lé wó gyo kat jáng, ngá unghkaû mâ é zoshâng gi, gabú luî byam chyû nyi ri. ⁴⁵ Haú Yhumsing taî é dang gi, gè gè dik lò râ nghut lhê ga luî, lumjíng é myiwe gi, hkungsô wó nyi ri." gâ ri.

Mariq É Hkya-on Dang

⁴⁶ Haú hkûn, Mariq gi,
"Ngá é i-myt mai haú Yhumsing lé hkya-on nyi lhê,
⁴⁷ ngá é woi-nyí le, Garai Gasang ngá é hkyi yù
Sû má gabú nyi lhê.

48 Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuî mai ipyat dedu má, ngo lé gi, hkungsô wó nyî sù, gâ nyi bekô râ nghut lê.

49 hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,

Yhâng é myìng gi, chyoiyúng nyi ri ô.

50 Yhang lé gyuq hoq nyî bâng é ahtoq má, Yhang shogyo nhikmyîn é hkyô gi,

pyat bán hkangmó jé shoq hkâ-nhám le joq nyi râ nghut lê.

51 Yhâng é wum-o bo é loq èq mauhpo mù mó pé lé tûn shit bê.

Yhumsîng myit é hkyô má nghutbûn nyi é bang lé, Yhang lhoq pyo pyám bê.

52 Zaugun suwún wuî lé gi, zau zûng tanghkuq mai lhoq hkyô pyám mù,

i-myt nyhûm bang lé gi, lhoq myhâng bê nghut ri.

53 Zòmüt hui bang lé gi, ge é zoshuq gyi shoq byi tso mù,

sutzè wó bang lé gi, akôm nhang kat bê nghut ri.

54-55 Nga-nhûng é îchyí îwâ pé lé taî tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyîn nyi râ gâ e lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luî, taî ri.

⁵⁶ Mariq gi, Elizabet chyáng lhamó sum hkyap kô nyi mù luí, yhûm shut dum taû lò byuq bê.

Wui-myhup Sará Yohan Baû É Hkyô

⁵⁷ Hau htâng, Elizabet gi, zoshâng bau râ buinyi jé mù, yuqgè zo bau bê. ⁵⁸ Yhang lé haû-í kô é jeju Yhumsîng tûn shit é hkyô lé, yhâng é yhumkyo buinùm wuì eq mung moq gumang wuì wó gyo kojáng, yhang eq rahá gabú nyi akô.

⁵⁹ Ahkuî shit nyi jé jáng, yhangmoq gi, zoshâng haû lé ahpyo-kuq hpyit byi râ matú lé kôluí, yhâng wâ é myîng eq rajung za, Zahkariq ga myhîng byi râ dâ akô. ⁶⁰ Nghut kôlhang, yhâng nu gi, "A nghut, Yohan nghû sheq myhîng râ nghut lhê." ga tû taí ri.

⁶¹ Yhangmoq gi, "Náng é amyû suisho má le, haû su gâ é myîng rayuq le a bo wú shi." ga luí, yhang lé taí akô.

⁶² Haú hkûn, zoshâng haû lé hkâsu nghû myhîng nau lhê laq ga, yhâng wa lé loq lik lik shit mù myi akô. ⁶³ Zahkariq gi, kê jung longpá dîng yù mù, "Yhâng é myîng gi, Yohan nghut lhê." ga kê shit ri. Haû mù, lhunglhâng bang gi, maú byuq bum akô. ⁶⁴ Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkyâ-ôn nyi ri. ⁶⁵ Haû su dut é hkyô lé, wó gyô é awui ayàm lhînghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo ló bum akô. ⁶⁶ Wó gyô é lhunglhâng bang gi, haú hkyô lé yhumsîng é i-myit unghkaú má kat to mù, "Zoshâng shî gi, hkâsu dut lò râ sù nghut lhê lú?" ga myit wú nyi akô. Haí mù gâ le, haû Yhumsîng é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haú hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ "Haú Yhumsîng, Israelaq é Garai Gasang lé hkya-on sháng ô!

Haí mù gâ le, Yhang gi, Yhâng é amyû lé, lé kûm wú mù luí, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú wum-o bo é hkyi yu é hkyuî† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pê é nhut mai taí tô é eq rajung za nghut ri.

⁷¹ Haú hkyuî gi, nga-nhúng lé nga-nhûng é gye pê chyáng mai le, a nguì a naù bang banshoq é loq mai le, hkyi yù râ nghut lê.

⁷² Îwa Garai gi, nga-nhûng é îchyí îwa pé lé shogyo nhikmyin hkyô lé tân shit râ matú, Yhang byî tô é chyoiyúng dangshikaq lé a tô-myí nghut ri.

⁷³ Haú gi, nga-nhûng é chyiké Abraham lé byi tô é danggidiq nghut lê.

⁷⁴⁻⁷⁵ Nga-nhúng lé gye pê loq mai hkyi yù râ eq, nga-nhúng asak dui tô é buinyì banshoq má, Yhâng é hí má a gyuq a kyum é za, chyoiyúng é eq dingmán é hkyô mai, Yhang lé wó dojaú nyí nhâng râ matú, Yhang jé lé é nghut lê.

† **1:69** Hkyi yu é hkyuî gi, Yhumsîng Yesuq lé taí é nghut ri.

- 76 Ngá zo ê, nàng gi, Yhumsing é hí má, e ló mù luî, Yhâng é hkyô lé hen lajang byi râ sù nghut é yanmai, nang lé Myhang htáng htúm Su é myiqhtoi ga kó râ nghut lhê.
- 77 Nàng gi, Garai Gasâng é byu pé lé, yhangmoq é yubak mara hkyut pyám byî é dong, hkyi yu é hui râ hkyô lé taî kyo râ sù nghut lhê.
- 78 Haî mù gà le, Garai Gasâng é shogyo nhikmyin é yanmai, napsûn bui† gi, mauhkûng mai nga-nhûng chyáng htoq lé lô râ nghut lhê.
- 79 Yhang gi, mauchut hkaû§ eq shî wup hkaû má lúng to bang lé builoq su duqbó byi râ eq, nga-nhúng lé nguingón simsaq é hkyô shut shuî e ló râ sù nghut lhê." ga ri.
- 80 Zoshâng haû gi, kô lò mù, woi-nyí wum-o bo lò luî, Israelaq byu pê chyáng htoq shit lo é buinyì jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô

Mht 1:18-25

¹ Buinyì haú pé má, Romaq hkoséng ming ban-shoq mã é byù lhunglhâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri. ² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri. ³ Haú hkûn, byù du jup gi, myìng jihpán kat râ matú, ó le ô é wà shut ló bum akô.

† **1:78** Napsûn bui gà é gi, Yesuq lé taî é nghut lhê. § **1:79** Mauchut hkaû gà é gi, Garai lé a sé mù woi-nyí má shi tô é bang lé gà lhê.

⁴ Haû mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gâ é Dawiq é wà shut, ⁵ yhang dúng tô é myiwe Mariq eq rahá myìng kat lhóm râ matú jé doq ló akô; Mariq kúm gi, gungloq lai to bê nghut ri. ⁶ Haû Betlehem má nyi tô ashî le, Mariq gi, zo hkû râ buinyì jé mù, zomún yuqzo lé bau bê. ⁷ Yhang gi, zoshâng haû lé panchoq eq htup mù no tso langhkang má lheq tô ri; haî mù gâ le, bíng yhûm má yhangmoq nyi râ jowò a joq lo é yanmai nghut ri.

Sau Zúng Bang Yesuq Chyang Jé Lé É Hkyô

⁸ Ahkuî, haú ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsîng é hpungwup shingkang gi, awui ayàm má duqbang lò luî, yhangmoq gyai gyuq bum akô. ¹⁰ Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyang wun lé lo lhê. ¹¹ Hkû-nyì lhê buinyì má, Hkrisduq* nghu é Yhumsîng nghut é hkyi yù Sû gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq eq htup mù, no tso langhkang má lheq tô láng ra nghut lhê." ga luî, yhangmoq lé tai ri.

* **2:11** Grik dong Hkrisduq gâ é gi, xû but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê.

¹³ Haú hkûn jáng yhang, mauhkûng bang rajùm rayò htoq lô mù, maumang lagyo haú eq rahá Garai Gasang lé hkya-ôn é dang gi,

¹⁴ "Htoq tsáng myhâng má, Garai Gasang gi, hpung-wup shing kang bo nyì sháng gaq ô!

Myigùng htoq má le, Yhang ô nau é byu pé má, nguingón é gi, hkâ-nhám le joq nyì sháng gaq ô!"

gâ akô.

¹⁵ Maumang lagyô pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuí za Yhumsîng nga-nhúng lé lé shit kyô lai ló bê hkyô lé ê gôn wú sháng." ga luí, rayuq eq rayuq tai lhûm akô.

¹⁶ Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú lé le, ê myàng akô. ¹⁷ Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé tai kyô é dang lé, tai pyô kat bekô. ¹⁸ Wó gyô é bang banshoq gi, haú sau zúng bang tai kyô é dang lé, maú byuq bum akô. ¹⁹ Mariq kúm gi, dut lo é hkyô pé eq wó gyô é dang banshoq lé unghkaú má matsîng yù mù luí, nik nik myit wú nyi ri. ²⁰ Sau zúng bang gi, yhangmoq lé maumang lagyo tai kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taú ló bekô nghut ri.

Yesuq Lé, Noqkuq Yhûm Má Shuí E É Hkyô

²¹ Zoshâng haú, shit nyí jé mù ahpyo-kuq hpyit byi râ buinyí má, yhang unghkaú má a lúng shi

mai maumang lagyo myhîng tô é myîng eq rajung za, yhang lé, "Yesuq" ga luî, myhîng byî akô.

²² Mosheq é tarâ eq rajung za, yhangmoq é lhoq san lhoq sêng é buinyî byîng jáng, Yhumsing é tarâ má, "Zomún yuqzo hkanmó gi, haû Yhumsing é hí má chyoiyúng sù wó nghû râ matú, Yhumsing chyáng ê ap byi râ lhê."✧ gâ é eq, ²³ "Hpûngkyui razúm, haû a nghut jáng, nghoqmyhû zo í du,"✧ hkungga byi râ lhê ga kê tô é eq rajung za, ²⁴ Mariq eq Yosep gi, zoshâng haû lé shui mù Yerusalem wà mó shut é akô.

²⁵ Haû hkûn, Simeon gâ é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israelaq lé nhik lhoq tîng râ ahkyîng lé lánng nyî sù nghut ri; haû Chyoiyúng Woi-nyî le, yhâng é ahtoq má nyi nyi ri.

²⁶ Yhang gi, haû Yhumsîng Hkrisduq lé a myang é za, shî râ a nghut, ga Chyoiyúng Woi-nyî èq tân shit tô é hui sù nghut lhê. ²⁷ Yhang gi, Chyoiyúng Woi-nyî èq shui mù, noqkuq yhúmhaû má ê jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaû má shuí wang ló kôjáng, ²⁸ Simeon gi, zoshâng lé loq èq lhom bún yû mù, Garai Gasang lé hkya-ôn é dang gi,

²⁹ "Yhumsîng ê, nánng é danggidiq gi, dik bê nghut ri; hkû-nyî nánng é jùn ngò gi, nguîngón é èq wó shi ló berâ nghut lhê.

³⁰ Haî mù gâ le, byù lhunghâng bâng é matú, nàng lajang tô é hkyi yù hkyô lé, ngá myoq èq yhang wó myâng bê.

✧ 2:22 Htoq Ló 13:2,12 ✧ 2:23 Nhong 12:8

31 Haû gi, byù myû chângjup wó myâng râ matú, náng lajang to byî é nghut mù,
 32 tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shingkâng matú le nghut nyi ri."

gâ ri.

33 Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô.

34 Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri. 35 Haû mù, byù myo myô é unghkaû má, myit mi-myt lé lhoq htoq shit râ nghut lhê. Náng é myit nhiklum má, shâm chûn eq htaû kyâng kat é su gâ é lé, náng hui zo râ nghut lhê." ga taí ri.

36 Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyî pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. 37 Myiwe haû gi, noqkuq yhûm mai a htoq ê za, nyí myín a ga noqkuq dojaú nyi mù, zoshuq gám luí kyûdûng nyi ri. 38 Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.

39 Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ

é yhangmoq wà Nazaret shut dum taû ló bekô. ⁴⁰ Zoshâng haû gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhkaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poî jé hkgámó, zàn wui Yerusalem wà mó má ê ê kut akô. ⁴² Yesuq raxe í zân jé jáng, poî haû, ê bo lòm ra htungli joq é eq rajung za, yhangme wui yhanghpe wui doq ló akô. ⁴³ Haû poî buinyi lai luí, dum taû lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò rà su ngàm kômù luí, Yosep eq Mariq gi, ra-nyí buigyùm chap sô ló bê htâng má, mung moq wui eq, sê lhùm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taû jé e ló bekô. ⁴⁶ Ahkuí, sum nyí nghû râ nyí sheq, noqkuq yhúmhkaû má, tarâ sará pé é gung gung má zùng to mù, yhangmoq é dang lé gyo yù luí, dum taû myi myi kut nyi é lé, yhangnhik é myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tû taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhângnu gi, "Ngá zo é, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é eq, nàng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haî mù luî, ngo lé châng ho akô lú? mauhkûng mâ é ngá Wâ é yhûm má ngò nyi râ lê le gi, nungnhik a sé kó lú?" ga luî, yhangnhik lé tû taî ri. ⁵⁰ Nghut kôlhang, yhangnhik gi, Yesuq taî é dang lichyûm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taû jé gyó lô luî, yhangnhik nyo é dang lé gyo mù nyi tô ri. Yhângnu Mariq gi, dut laî lò bê hkyô pé banshoq lé, yhâng é myit nhiklhum má matsîng tô ri. ⁵² Yesuq gi, hpaqchyî byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

*Wui-myhup Sará Yohan Mhoqshit É Hkyô
Mht 3:1-12; Mrk 1:1-8; Yhn 1:19-28*

¹ Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mú má, kut nyi akô. Haû hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haû mù, yhang gi, Yodan làng yàm jowò hkangmó má, sô jón wún luî, yubak mara hkyut pyám byî é hui râ matú myit lhîng mù, wui-myhup hkâm* yù râ hkyô lé, hko kyô nyi ri. ⁴ Haû gi, myiqhtoi Esai-aq laiká má,

* **3:3** Wui-myhup hkâm gâ é gi, baptisma lé gâ é nghut lhê.

"Haû yoso má, byù rayuq garû taî é htê gi,
'Haû Yhumsing é matú, hkyô hen to keq, Yhâng é
matú hkyô lhoq nyhang to keq;

⁵ wuìhkung langhkop hkanmó lé lhoq pyíng ra râ
nghut lhê;

bùm eq wingkáng hkanmó lé hpyit pyám ra
râ nghut lhê;

agoí aguq é hkyô hkat hkanmó lé lhoq nyhâng ra
râ nghut lhê;

ahkung ahkop dut é hkyô hkat hkanmó lé
lhoq rhá ra râ nghut lhê.

⁶ Haú hkûn, byù banshoq gi, Garai Gasâng é hkyi
yù hkyô lé myàng râ nghut lhê."[✧]

ga luî, kê tô é eq rajung za nghut ri.

⁷ Shiwa byù rajùm rayò gi, Yohan é loq má wui-
myhup hkâm yù râ ga luî htoq lé lô kêjáng, Yohan
taî é gi, "Duq htan é lhangmuì amyû pé† ê, jé lô
râ yubak dam mai wó hpang lut kó sháng gaq ga,
nungmoq lé ó yuq taî pûn é lhú? ⁸ Myit lhîng hkyô
eq gingdán é ashi zui keq. 'Nga-nhúng gi, Abraham
é yhangzo yhangshû pé nghut lhê.† nghû luî,
yhumsing é i-myit unghkaû má hkâtaî kó. Hkâsu
mù gâ le, ngò, nungmoq lé taî kyo kôlé, Garai
Gasang gi, luqgok shí pé mai, Abraham é matú
yhangzô pé wó hpan htoq kat lhê. ⁹ Ahkuí lháng,
Garai Gasang gi, Yhâng é wazung lé haû sikgâm
wang pé má tô to bê nghut ri; haû mù, ge é ashi

✧ **3:6** Esai 40:3-5 † **3:7** Lhangmuì amyû pé gâ é gi, Lukaq 3:7-10
má bo é Hparishe eq Saduke pé lé taî é nghut ri. † **3:8** Nga-nhúng
gi, Abraham é yhangzo yhangshû pé nghut lhê gâ é gi, Abraham é
yhangzo yhangshu nghut é yanmai, Garai Gasang jéyáng é lé a hui
râ ga, myit yu é hkyô nghut ri.

a zui é agàm hkanmó lé gi, htuq lhêng pyám mù, myi má dú kat pyám râ nghut lhê." gâ ri. §

¹⁰ Haú hkûn, shiwa byu pé gi, "Haú nghut le gi, ngamoq hkâsu kut le gè râ lú?" ga luî, yhang lé myî akô.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luî, yhangmoq lé tâ taî kat ri.

¹² Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ lú?" ga luî, yhang lé myî akô.

¹³ Yhang gi, "Nungmoq hkyui yù râ masat tô é htoq lai shoq hkâyû kó." ga luî, yhangmoq lé tâ ri.

¹⁴ Gyezô pé ra-am le, "Ngamoq gi, hkâsu kut le gè râ lú?" ga luî, yhang lé lé myî akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpaû èq gé bûn nyi keq." ga luî, yhangmoq lé tâ ri.

¹⁵ Shiwa byu pé kúm gi, Hkrisduq lé myit lánq nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaû má myit wú nyi bum akô. ¹⁶ Haú hkûn, banshoq bang lé Yohan tâi é gi, "Ngò gi, nungmoq lé, wui èq za wui-myhup hkâm byî lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyî-tsung tui lé hpyî râ lhang a gingdán; Yhang gi, Chyoiyúng Woi-nyî má le, myi má le, nungmoq lé wui-myhup hkâm byi râ nghut lhê. ¹⁷ Yhang gi, loq má byò chung to mù, guq

§ 3:9 Bun zo shí lhûm é lichyúm gi, myit a lhîng bang lé, Garai Gasang jéyáng é buinyî jé râ nghut lhê ga naû é nghut ri.

chyarâng mâ é guq bùm lé hik sân pyám luî, já é guq cham lé gi, guqchyî má tsing kat to mù, guqsôm lé kúm gi, hkâ-nhám le shi byuq a sê é myî èq nyhé hkyô pyám râ nghut lhê." gâ ri.* ¹⁸ Haû mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

¹⁹ Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhòqshit bê nghut ri. ²⁰ Mara haú pè htoq agó, Herut dum kut jat yu é mara gi, Yohan lé htóng má lhûng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹ Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng bóng lô mù, ²² haû Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chytđap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkûng mai dangtê htoq lo ri.

Yesuq É Byù Xik Shap Kyô É Hkyô

Mht 1:1-17

²³ Yesuq gi, Yhang mù zúi hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep

* **3:17** Haû eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

gi, Heli é yhangzo, Heli gi, Mahtat é yhangzo, ²⁴Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³²Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴Yudaq gi, Yakup é yhangzo, Yakup gi, Isak é yhangzo,

Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Eruk é yhangzo, Eruk gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taû lo é hkûn, Chyoiyúng Woi-nyí gi, Yhang lé yoso shut shuí e ri. ² Haú má, Yesuq gi, buinyí myi xê nyí jé shoq, nat Tsadán èq gunlaú é huí ri. Buinyí haú gyoro má, Yesuq gi, haí le a zô é yanmai, zòmut hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luggok shí lé muk dut nhâng aq." ga luí, Yhang lé taí ri.

⁴ Haú hkûn, Yesuq gi, "'Byù gi, muk èq za asak dùì râ a nghut.' ga luí, Chyúmdang má kê tô ri."☆ ga yhang lé tú taí ri.

☆ 4:4 Tarâ Pun 8:3

⁵ Hau htâng, nat Tsadán gi, Yesuq lé, gyai yhang myhang é bùm htoq má shuî doq ló mù, mingkan má joq é mingdán pé banshoq lé razup má za tûn shit luî, ⁶"Shî ahkáng ayá banshoq eq haû mingdán é hkikhkâm hkyô banshoq, ngò nang lé wó byî lhê; hkâsu mù gâ le, haú pé banshoq gi, ngo lé ap byî to bê nghut mù, ngò byî nau é sũ ó yuq lé nghut kôlhang, byi râ nghut lhê. ⁷ Haû mù, Nang, ngo lé noq é nghut jáng, shí pé banshoq Nang é dut râ nghut lhê." ga, Yesuq lé taî ri.

⁸ Haú hkûn, Yesuq gi, "'Haû Yhumsîng náng é Garai Gasang lé za, nang noqkuq dojaú ra râ nghut lhê.'[☆] ga luî, Chyúmdang má kê tô ri." ga luî, yhang lé tû taî ri.

⁹ Nat Tsadán gi, Yesuq lé Yerusalem wà mó má shuî ê mù, noqkuq yhum je myhang é shûhtâng htoq má yap nhang to luî, "Nang, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gâ le,

'Nang lé upzúng byî nyi râ matú, Garai Gasang gi, Yhâng é maumang lagyô pé lé taî to râ nghut mù,

¹¹ luqgok má náng é hkyî a ló htung shoq, yhang-moq é loq èq Nang lé lhom bún yû kó râ nghut lhê.'[☆]

ga luî, Chyúmdang má kê tô ri." ga taî ri. ¹² Nghut kôlhang, Yesuq gi, "'Haû Yhumsîng, nungmoq é Garai Gasang lé, wó chyam wú râ a nghut.'[☆] ga luî, Chyúmdang má bo tô ri." ga, yhang lé tû taî ri.

[☆] **4:8** Tarâ Pun 6:13 [☆] **4:11** Hkya-on 91:11-12 [☆] **4:12** Tarâ Pun 6:16

¹³ Nat Tsadán gi, gunglau é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm É Hkyô Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taû lo ri. Haú mau jowò hkgámó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkyá-ôn nyi bum akô.

¹⁶ Hau htâng má, Yhang nyi kô lo é Nazaret wà má dum taû jé ló bê; Yhang gi, hkâ-nhám le kut nyi é eq rajung za, Bánno buinyì* lé tarajong má wang ê mù, laiká nghap râ ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haû lé hpông kat le,

¹⁸ "Yhumsîng é Woi-nyí gi, ngá é ahtoq má nyi nyi ri;

hkâsu mù gâ le, asho awuî é bang lé gabú danglù hkô kyo râ matú, Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le,

zik zo huî é bang lé nhang kat nhâng râ eq,

¹⁹ Yhumsîng, Yhâng é byu pé lé hkyi yù rà ahkýng zanwut lé hkô kyo râ matú le, Yhang, ngo lé nhang kat bê nghut ri."☆

ga luî, kê tô é jowò lé myang záng mù nghap ri.

* **4:16** Bánno buinyì gâ é gi, Yudaq byu pé nòmu é buinyì lé gâ lhê. Ahkui lhê é dông ga jáng, Bánno buinyì gi, bat htoq hkyuq nyí lé âng ri. ☆ **4:19** Esai 61:1-2

²⁰ Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong mâ é byù lhunghâng bang gi, Yesuq lé chòm wú tô é hkûn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hi kat ri.

²² Lhunghâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lhú?" ga taí bum akô.

²³ Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.'† gâ é sanghkyang èq le, 'Nàng, Kaperna-um wà má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó râ nghut lhê." ga taí ri.

²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhang, haú ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta wà mâ é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mâ

† **4:23** Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauho mù wó tún shit râ nghut lhê." gâ é nghut lhê.

é rayuq le wó sânyúng yù kô é a nghut; Suriq byù Naman ga sù tûngbaù hpó za sheq wó sânyúng é nghut lhê." ga taî ri.

²⁸ Tarajong hkaû mâ é lhunglhâng bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luî, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyûn hpyit hkyô pyám rá ga shuî e ló akô. ³⁰ Nghut kôlhâng, Yesuq kúm gi, byù hpûng haù mai so hkoq htoq ló byuq bê nghut ri.

*Agè Ashop É Nat Lé Yesuq Hkat Htoq É Hkyô
Mrk 1:21-28*

³¹ Hau htâng, Yesuq gi, Galile mau mâ é Kapernaum wà má jé ê mù, Bánno buinyì má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taî nyi é yanmai nghut ri.

³³ Yesuq, tarajong hkaû má mhoqshit byî nyi é hkûn, nat gang wang júng é byù rayuq htê mó o mó èq taî é gi, ³⁴ "Ê, Nazaret wà byù Yesuq ê, ngamoq gi, Nàng eq haî sêng lhê lhú? Ngamoq lé lhoq hten rá matú, Nàng jé lé é nghut lhê lhú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gûng má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haù mù luî, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasù é dang wá nghut lhê lhú? Yhang

gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhûm bum akô. ³⁷ Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taí pyo hû ló bûm bekô nghut ri.

Yesuq Nòhpyo Lhoq Gê Byî É Hkyô
Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhûm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byî râ matú, Yesuq lé garúm dung byî akô. ³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq ke byi luí, lhoq gê byî ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaú má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkûm wú akô. ⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai

Gasang gi, ngo lé nhang kat bê nghut lhê." ga luî, yhangmoq lé taî ri. ⁴⁴Haû mù, Yesuq gi, Yuda mau mâ é tarajong pé má, hko kyô wún nyi ri.

5

Sâng-hi Ji Yù Huê É Chángzô Pé *Mht 4:18-22; Mrk 1:16-20*

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyîn chyap wang lé lô kô é hkûn, ² nhông gin-gau yàm má lhaî razúm joq tô é lé, Yhang myang kat ri. Ngogûn dú bang kúm gi, lhaî mai htoq mù, yhangmoq é gùn pé lé chî nyi akô. ³ Yesuq gi, Simûn é lhaî má wàng mù gin-gau mai rachyit lhoq kang nhâng luî, haû lhaî htoq má zung to mù, shiwa byu pé lé mhoqshit taî kyô nyi ri.

⁴ Dang ban taí jáng, Yesuq gi, Simun lé, "Wuî nik é shut hui luî, ngozo wó kông yù râ matú, nungmoq é gùn pé lé dú hkyô kat keq." ga taî ri.

⁵ Simun gi, "Yhumsîng ê, ngamoq amàn ra-myin mau shikut wú kôlhang, haî le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tú taî ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su dut é yanmai, ⁷ lhaî gó lhum mâ é luzúm wuî lé, lé garúm yù râ matú loq lik lik kat kôjáng, haû bang lé lô mù, haû lhaî í lhum aluq myup ló shoq ngozo lé kat pyíng bekô.

⁸ Simun Petruq gi, haû lé myàng jáng, Yesuq é hkyî wang má hkyihput htuq mù, "Yhumsîng ê,

ngá chyáng mai ló byuq aq, haî mù gâ le, ngò gi, yubak dap é byù nghut nyi lhê." ga taî ri. ⁹ Haî mù luî gâ le, Simun le, yhang eq nyi tô é lhunglhâng bang le, haû su ngozo wó yu é yanmai, maú nyi bùm kômù nghut ri. ¹⁰ Simûn é luzúm nhik, Zebedi é yhangzo Yakuq eq Yohan le, haû su chôm maú byuq akô.

Hau htâng, Yesuq gi, "Hkâgyuq, ahkuî mai nàng gi, byù lé châng kóng sù dut râ nghut lhê." ga luî, Simun lé taî ri. ¹¹ Yhangmoq gi, wuiyàm má jé jáng, lhaî pé eq yhangmoq é zè banshoq lé tô pyâm to luî, Yesuq htâng châng bekô nghut ri.

Manggâm Dap Bang Lé Yesuq Lhoq Gê Byî É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdù é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luî, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haú yuq lé ê záng luî, "Ngò dóng lhê, sân-yúng aq hkoi." ga taî ri; haú hkûn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaî kyo. Nghut kôlhâng, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taî hkûm kat ri.

¹⁵ Nghut kôlhâng, Yesuq é hkyô gi, je riyhang taî pyo hû jam ló mù luî, shiwa byù rajùm rayò gi,

Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup mǐng tô akô. ¹⁶ Yesuq kúm gi, Yhang baú tsik za yoso shut htoq ê mù, kyû ê dung dung kut ri.

Gùngjum Shî Sû Lé, Yesuq Lhoq Gê Byí É Hkyô
Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsing Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shî sù rayuq lé taphkang mai waq lé lô kômù, haú yuq lé, yhúmhaû má nyi tô é Yesuq é hí má, wó lheq byi shoq ga hkyô ho nyi akô. ¹⁹ Byù lûm myô chyîn chyap to mô, haú nò sù lé hká dông le a wó shuí wàng kôluí, haú yhumhkung htoq shut waq doq ló mù, haú yuq lé taphkang eq roq, shiwa hpong gung gung, Yesuq é hí ang ang má hkyô hang kat akô.

²⁰ Yesuq gi, yhangmoq é lumjǐng myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shî su ga luí, Garaí Gasang lé rhoí dang taí é sù gi, ó yuq wá nghut lhê lhú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit són wuî nyi bum akô.

²² Yesuq gi, yhangmoq myit són wuî nyi é hkyô lé sé mù, "Nungmoq é i-myit hkaû má, haí mù shí pé

lé myit sôn wuî nyi akô lú? ²³ 'Náng é yubak mara lé hkyut pyám byi bê.' nghû taí râ eq, "Toq luî, hkyô so aq.' nghû taí râ má, hká hkun je taí lui lhê lú?" ²⁴ Nghut kôlhang, haû Byu Yhangzo* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga mù, haû gùngjum shî sù lé, "Ngò, nàng lé taí bá, toq aq, náng é taphkang yu chùng luî, yhûm taú ló aq hkoi." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chùng luî, yhâng é yhûm shut Garai Gasang lé hkya-on kungtôn uchyang ló byuq bê. ²⁶ Byù banshoq bang gi, gyai maú byuq kômù luî, Garai Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amû pé lé myàng bê." ga taí nyi akô.

Yesuq Gi, Lewiq É Yhûm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga taí ri. ²⁸ Lewiq gi, haú má é zè banshoq lé tô pyám to mù, toq luî, Yhâng htâng cháng bê nghut ri.

²⁹ Hau htâng, Lewiq gi, yhâng é yhûm má Yesuq é matú zoshuq poí mó kut byî ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haû mù luî, Hparishe pé eq yhangmoq hpúng má é tarâ sará

* **5:24** Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

pé kúm gi, "Nungmoq gi, haî mù luî kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hûn dang taî akô.

³¹ Yesuq gi, yhangmoq lé, "Wángzán bang chi sará a ra kó, nõhpyo hui bang za sheq ru râ lhê.

³² Ngò gi, dingmán bang lé wut yù râ matú jé lé é a nghut, yubak dap bang myit lhîng râ matú sheq jé lé é ru nghut lhê." ga tú taî ri.

*Zoshuq Gám Hkyô Eq Séng Luî, Yesuq Taî É Hkyô
Mht 9:14-17; Mrk 2:18-22*

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haû su kut akô; nghut kôlhâng, náng é chángzô pé gi, haî mù zô nyi shuq nyi akô lhú?" ga Yesuq lé taî akô.

³⁴ Yesuq, yhangmoq lé tú taî é gi, "Bíng pé gi, lusik eq rahá nghut nyi to ashî hkûn, yhangmoq lé zo shuq wó gám nhâng râ lhú? ³⁵ Nghut kôlhâng, lusik† lé yhangmoq chyáng mai shuî yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

³⁶ Dangtú dông mai le, Yesuq, yhangmoq lé taî é gi, "Mebu sik mâ é lâng cheq yû mù, mebu xau má hpo é gi, ó a kut wú kó; haû su kut é nghut jáng, mebu sik lé le lâng cheq pyâm é dut mù, pán jap sik le mebu xau eq du lhum râ a nghut. ³⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. ³⁸ Haû

† 5:35 Lusik gâ é gi, Yesuq lé taî nau é nghut lhê.

su a dut shoq gi, tsibiyiq wing asik lé, shokuq htông asik má kat ra râ nghut lhê. ³⁹ Tsibiyiq wing axau shuq nyî bê sù gi, asik lé a shuq naû nghut râ; hkâsu mù gâ le, 'Axau sheq je nghâm ri.' ga taí râ." gâ ri.

6

Bánno Buinyì Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyì ra-nyí má, Yesuq gi, Yhâng é chángzô pé eq yò hkaû mai sô lai ló é hkûn, Yhâng é chángzô pé gi, kyôshi ratsuí langshap yû mù, loq eq nè hpuq zô akô. ² Haû mù luí, Hparishe pé ra-am gi, "Bánno buinyì má a ge kut jung lé, nungmoq gi, haí mù luí haû su kut akô lhú?" ga taí akô.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmút huí é hkûn, hkâsu kut é hkyô lé, nungmoq a nghap wú kó lhú?"

⁴ Dawiq gi, Garai Gasâng é yhûm* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lhú?" ga tû taí ri. ⁵ Hau htâng, Yhang gi, "Haû Byu Yhangzo gi, haû Bánno buinyi é Yhumsîng nghut lhê." ga yhangmoq lé taí ri.

Loq Jum Shî Sù Lé Yesuq Lhoq Gê Byí É Hkyô

Mht 12:9-14; Mrk 3:1-6

⁶ Gotû Bánno buinyì má le, Yesuq gi, tarajong má wàng mù mhoqshit nyi é hkûn, loqyo loq ajum shi

* **6:4** Garai Gasâng é yhûm ngu é gi, Yerusalem wà mó má joq é saksé zúm lé gâ é nghut lhê.

byuq é byù rayuq haú má nyi tô ri. ⁷ Haú hkûn, tarâ sará pé eq Hparishe pé gi, Bánno buinyì má nòhpyo lhoq gè byi râ lhú ga luí, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myt lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga taí kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myî wú kôlé, Bánno buinyì má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luí, yhangmoq lé taí ri.

¹⁰ Hau htâng má, yhangmoq banshoq lé lhing wú mù, haú loq jum shî sù lé "Náng é loq nyhang kat aq." ga taí kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhik-yo naú kômù luí, "Yesuq lé hkâsu wá kut pyám râ lhú?" ga luí, rayuq eq rayuq taí lhûm nyi akô.

Raxe Í Yuq Lé Lagyo Ga Myhîng Yu É Hkyô
Mht 10:1-4; Mrk 3:13-19

¹² Haú yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri. ¹³ Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyo pé ga myhîng to byí ri. ¹⁴ Haú bang gi, Yesuq eq Petruq ga myìng myhîng byî é Simun eq, yhanggu André, Yakuq eq Yohan, Hpilip eq Barhtolume, ¹⁵ Mahte eq Htomaq, Alhpe é

yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

*Hkungsô Wó É Hkyô Eq Dingnyé Wó É Hkyô
Mht 4:23-25; 5:1-12*

¹⁷ Yesuq gi, yhangmoq eq rahá gyó ló mù, jang-gyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuìshuq lung-aú ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù râ eq yhangmoq é nòhpyo lhoq gê nhâng râ matú, rahá za zup míng tô akô. Agè ashop é nat èq zing-ri huì é bang le ge byuq akô. ¹⁹ Yhâng é gùng mai htoq é wum-ô èq byù banshoq lé lhoq gê byi nyi é yanmai shiwa byu pé le Yhang lé wó zàng shoq ga, ho nyi akô.

²⁰ Haú hkûn, Yesuq gi, Yhâng é chángzô pé lé wú kat luí taí é gi,

"Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuí, zòmut wuìshit huì nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó râ nghut lhê.

† **6:15** Zelutuq gà é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê. ‡ **6:20** Garai Gasâng é mingdán gà é gi, Garai Gasang up é lé gà lhê.

Ahkuî, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wui kó râ nghut lhê.

22 Haû Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huì é hkûn, nungmoq gi, hkungsô wó nyi ri.

23 Haú hkûn lé, gabú byam chyû nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taî lhê, hkâsu mù gâ le, yhangmoq é îchyí îwa pé le myiqhtoî pé§ lé haû su kut wú bekô."

24 Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhumsing gùng má nhik shî nhik dik é hkyô lé huì yù bekô.

25 Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmut wuîshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.

26 Byù banshoq bang, nungmoq lé ge é byù ga kôjáng, nungmoq gi, dingnyé wó râ, hkâsu mù gâ le, yhangmoq é îchyí îwâ pé le, myiqhtoî pyoq pé* lé, haû su ga taî wú bekô.

§ 6:23 Myiqhtoî pé le zing-ri huì é yanmai, yhangmoq chyunghuq wó nyi akô. Haû eq rajung za, jamjau huì é bang nga-nhúng le chyunghuq wó râ nghut lhê. * 6:26 Myiqhtoî pyoq pé gi, Garai Gasang jéyáng é hui râ.

Gye Pé Lé Chyitdap Râ Hkyô
Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò tai kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq; ²⁸ nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dũng é sù lé le, byi pyám aq; náng zè yu pyám byi é su chyáng mai le, hkâdũng yù lo. ³¹ Nungmoq ô nau é dõng supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lhú? Yubak dap bang le, yhumsîng lé chyitdap é bang lé gi, chyitdap nyi akô. ³³ Nungmoq lé ge é dõng kut nyi é bang lé za, ge é dõng kut nyi kô le gi, nungmoq é matú hai akyû bò kó râ lhú? Yubak dap bang le haù su kut nyi akô. ³⁴ Supé lé zè chyí byi le, dum wó tau byi râ su dut é bang lé za, chyí byi le gi, nungmoq é matú hai akyû bò kó râ lhú? Yubak dap bang lháng chyí byi é myhó dum wó yû shoq, yubak dap é bang lé chyí byi akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dõng kut byi nyi keq. Dum wó taù yù râ lé myoq a byu é za, chyí ngho byi keq; haù su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é Îwa

Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyang Râ Hkyô

Mht 7:1-5

³⁷ A jéyang é za nyi keq; haû jáng, nungmoq le jéyang é a hui kó râ nghut lhê. A doqđân é za nyi keq; haû jáng, nungmoq le doqđân é a hui kó râ nghut lhê. Mara hkyut byi keq; haû jáng, nungmoq le mara hkyut byi é hui kó râ nghut lhê. ³⁸ Byi keq, haû jáng, nungmoq le dum byi é hui kó râ nghut lhê. Mân é búng mai byíng mui shún shoq nhún chyíng, dún chyíng kat mù, nungmoq é tanghkoí hkaû má lik kat byi é hui kó râ. Hkâsu mù gâ le, nungmoq lik byi é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tân shit lhê lú? Yhangnhik í yuq é donghkong má byit gyó kó râ nghut lhê, a nghut kó lú? ⁴⁰ Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaû má lúng tô é siktúm† lé lhang a myit wú é nhíng, haí mù luí, nunggu nungmâng é myoqwàng‡ lé myang lhê lú?

⁴² Yhumsing é myoq má lúng tô é siktúm lé lhang a myàng sù nhíng, 'Gumang hpó è, náng myoq má lúng tô é myoqwàng lé, ngò choq pyám byi lé.' nghu luí, náng è gumang hpó lé hkâsu wó taí

† 6:41 Siktúm nghu e gi, yubak mara kô é lé taí lhê. ‡ 6:41 Myoqwàng nghu e gi, yubak mara atiq azo lé taí é nghut lhê.

râ lúh? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, nàng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashì zuí é, ge é shigâm hkâmá le a joq. Ge é ashì zuí é, a ge é shigâm le a joq. ⁴⁴ Haû mù luí, shigâm hkangmó lé, zuí é ashì lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú. ⁴⁵ Ge é sù gi, yhumsing é i-myit unghkaû mâ é sùtdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû mâ é agè ashop é sùtdò mai, agè ashop é zè pé lé lhoq htoq shit lhê. Haî mù gâ le, yhâng é i-myit unghkaû má byíng mui tô é lé za, yhâng é nhut mai taí htoq lo é nghut lhê.

*Luqhtân Htoq Má Yhûm Saí Sù Eq Myì Chîn Dum
Má Yhûm Saí Su É Hkyô*

Mht 7:24-27

⁴⁶ Ngò taí é eq rajung za lhang a wó châng kut kô é nhîng, haî mù luí, nungmoq Ngo lé 'Yhumsing ê, Yhumsing ê.' nghu nyi akô lúh? ⁴⁷ Ngá chyáng lé mù, ngá dang gyô yù luí, châng kut é sù ó nghut kôle, hkasù é sù eq wuí é lé ngò nungmoq lé shit kyo kôle. ⁴⁸ Haû yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuì jê lò luí wuibaù pê èq yhûm haû lé lo gùn kôlhang, ging ging tíng tíng saí to bê nghut luí, haû lé a wó gun nhún. ⁴⁹ Ngá dang gyô

yù mù, a cháng sù gi, apûn awang a saî é za myì chîn dum má wahpang yhûm saí sù eq wuí nyi ri. Wuibaù pê èq yhûm haù lé lo gun kat é eq, haù hkûn jáng, lêng gyop byuq ri. Yhûm haù byoq hten byuq é gi, yù whuí a bò loshoq dut byuq râ nghut lhê." gâ ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haù hkûn, Romaq gyezau rayuq é chytidap dui-nhâng zoshâng gi, shî-nò no nyi ri. ³ Haù u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí lé nhang kat ri. ⁴ Haù bang gi, Yesuq chyáng jé ê kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri; ⁵ hkâsu mù gâ le, yhang gi, nga-nhûng amyû lé chytidap é eq, ngamoq matú tarajong le kut byi sù nghut ri." ga luí, Yhang lé zuq zuq dúng wut nyi akô. ⁶ Haù mù luí, Yesuq gi, yhangmoq eq rahá za e ló ri.

Haù yhûm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng Yesuq ê, nàng gûng lé hkâlhoq hkyik lo. Nàng, ngá é laishîn-htâng má, lé nang râ lhangngò má a gingdán. ⁷ Haù mù, ngò, nàng chyáng jé lé râ matú gingdán é sù a nghut; Nàng, dang rahkun za taí kat laq, haù hkûn, ngá é dui-nhâng zoshâng ge ló râ nghut lhê. ⁸ Hkâsu mù gâ le, ngò le ahkáng

ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shî í lumjǐng é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to láng é lé ló myang akô.

Shî Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô. ¹² Haú wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhí haú eq rahá châng lé lo akô. ¹³ Yhumsǐng gi, haú chuimó myhí lé myàng jáng, yhang lé wú shogyo luí, "Hkâ-ngaú." ga taí ri.

¹⁴ Yesuq gi, gung shut huí ê mù, loq èq ê záng kat ri. Haú hkûn, waq tô é bang le jáng yap to byí akô. Yhang gi, "Zorâm ê, ngò, nang lé taí lhê, toq aq." ga taí ri. ¹⁵ Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnú chyáng dum ap byí ri.

¹⁶ Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú

nyi ri." ga taí nyi akô. ¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô.

¹⁹ Haú mù luí, Yohan gi, yhâng é chángzo í yuq lé ji yù mù, haú Yhumsing chyáng nhang kat luí, "Nàng gi, haú jé lé lô râ Sû nghut lhê lú? Haú a nghut jáng, ngamoq, góyuq lé lán ra shirá lú?" ga, myí nhang kat ri.

²⁰ Haú nhik gi, Yesuq chyáng jé jáng, "Nàng gi, haú jé lé lô râ sù nghut lhê lú? Haú a nghut jáng, ngamoq góyuq lé myoqbyu lán nyí ra shirá lú?" ga luí, Wui-myhup Sará Yohan gi, ngá-nhik lé nánng chyáng myí nhang kat ri." ga taí akô.

²¹ Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri. ²² Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik ló byuq é htàng má, Yesuq gi, Yohan eq séng luí, byù moq mó lé taí é gi,

"Nungmoq gi, haî lé hpuq wú râ matú, haî yoso shut e akô lhú? Lai eq hik nhûn é jamgàm lé wú râ matú nghut akô lhú? ²⁵ Haî a nghut jáng, haî lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut! Wú keq, gyai hpaú é mebu wut luî agùn agó wó bang gi, hkohkâm-wâng pé má sheq ru nyi lhê. ²⁶ Haî nghut le gi, haî lé wú râ matú ê kô é lhú? Myiqhtoi rayuq lé lhú? Haî kúm nghut ri. Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. ²⁷ Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê.'[☆]

gâ ri. ²⁸ Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lháng a nyi, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyú lhunglhâng bang eq kang guq bang gi, dang haú pé lé wó gyo kôjáng, Yohan byî é bap-tisma lé hkâm yù kô é nghut mù luî, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byî é bap-tisma a hkam yù kô mù luî, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taî é gi, "Haî mù luî, byù myû shí lé, Ngò, hai eq taî kê wú râ lhú? Yhangmoq hai eq wui akô lhú? ³² Yhangmoq gi,

'Nungmoq é matú, ngamoq sampyí mut byi kôlháng, nungmoq gi, a gó kó, ngamoq ngaú hkyangsâng kôlháng, nungmoq gi, a ngaú kó.'

[☆] 7:27 Mal 3:1

ga luî, gai pé má zùng uchyang rayuq eq rayuq wut taî lhùm nyi é zoshâng wuì eq wuì akô. ³³ Hkâsu mù gâ le, Wui-myhup Sará Yohan jé lé luî, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luî, nungmoq taî akô. ³⁴ Haû Byu Yhangzo jé lé luî, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taî akô. ³⁵ Nghut kôlhâng, hpaqchyî byéng-yá é yhangzô pé gi, hpaqchyî byéng-yá tengmán é hkyô lé saksé hkám byî nyi akô."* gâ ri.

Yubak Dap É Myiwe Rayuq, Yesuq Lé Xû But Byî É Hkyô

³⁶ Hparishe rayuq gi, Yesuq lé yhâng chyáng zang zo râ matú ji kat ri. Haû mù, Yesuq gi, haû Hparishe é yhùm má wàng luî zo râ matú zung tô ri. ³⁷ Haû hkûn, wú keq, haû wâ mâ é yubak dap é myiwe rayuq gi, Yesuq haû Hparishe é yhùm má zô zung tô é lé sé jáng, gyai hpau dap é namngón xû bo é luq hpyû bông yu lé luî, ³⁸ Yesuq é nunghtáng hkyî wàng má ngau yap to mù, Yhâng é hkyî má ngaubyî èq záng lhoq teq byi jáng, ûxam èq but sut pyám byî ri. Dum nghut jáng, nhut èq puq luî mura lé but byî ri.

³⁹ Yesuq lé ji é Hparishe wá gi, haû lé myàng jáng, "Shí yuq myiqhtoì nghut le gi, Yhang lé záng htùng é sù, ó yuq nghut é eq hkâsû é yubak dap é myiwe

* **7:35** Nghut kôlhâng, Garai Gasâng é hpaqchyî byéng-yá lé lhom hap yu é banshoq bang gi, Garai Gasâng é hpaqchyî byéng-yá haû, tengmán ri ga saksé hkám nyi akô.

nghut é lé, Yhang sé râ nghut lhê." ga luî, yhâng é unghkaû má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyî zo sù rayuq chyáng, chyîn dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri.

⁴² Haú nhik gi, chyîn xap râ ngùn a wó kôluî, chyîn yhumsîng gi, yhangnhik lé xap a ra lò gâ pyâm ri. Haú mù luî, haú nhik mâ é hká yuq gi, yhang lé je chyitdap râ lhú?" ga myî ri.

⁴³ Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e dông jô ri." ga taí ri.

⁴⁴ Haú hkûn, Yesuq, myiwe zo haú lé lhing wú luî, Simun lé, "Nàng myiwe zo shî lé myang lhê lhú? Ngò, nang é yhûm má wang le, hkyî chì râ uchyam, nang a byi, yhang kúm gi, ngaubyî èq ngá hkyî lé tik byi luî, yhâng é xam èq sut pyám byi bê. ⁴⁵ Nàng gi, ngo lé nhut èq a puq nghut ri; yhang kúm gi, ngò yhúmhaû má wang é mai ngá hkyî má a no loshoq puq nyi râ. ⁴⁶ Nàng gi, ngá ulhum má xú a but byî wú, yhang kúm gi, ngá é hkyî má nàm ngón é mura but byi bê nghut ri. ⁴⁷ Haú su mù, ngò, nang lé taí lé, haú myiwe gi, je chyitdap luî, yhang wó é yubak myo myo lé hkyut pyám byî é hui bê. Shau za mara hkyut pyám byî é hui sù gi, shau za chyitdap sù nghut ri." ga taí ri.

† **7:41** Denari rachap gi, ra-nyí lhê é byù rayuq é zuihpau eq wui ri.

⁴⁸ Yesuq gi, myiwe haú lé le, "Ngò, náng é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lhang wó hkyut pyám byi sù, shí yuq gi, ó wá nghut lhê l hú?" ga luí, myit nyi bum akô.

⁵⁰ Yesuq gi, "Náng é lumjǐng myit èq nang lé hkyi yù bê, ngón za ló aq hkoi." ga luí, myiwe haú lé taí kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasáng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ² Hau htoq agó, nat gang dap é mai le, nõhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mâ é Mariq le, ³ Herut é ikun zum sù Kuza é yhumsǐng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haú bang gi, yhumsǐng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkang wà mó mâ é bang gi, Yesuq chyáng zup zǐng lé lo bùm kômù shiwa byù moq mó zup ming tô é hkûn, Yesuq dangtú dông taí kyô é gi, ⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu èq záng nǎng pyeq pyâm lhê,

maulat nghoq pê èq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zugyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôlhang, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haû su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó èq taí kat ri.

⁹ Haú hkûn, Yhâng é chángzô pé gi, dangtú shí hai lichyúm nghut lhê lhú ga, Yhang lé myî akô. ¹⁰ Yhang gi, "Garai Gasâng é mingdán eq sêng é sê gyo wuí é hkyô pé lé sê gyo râ ahko ahkáng, nungmoq lé byî to bê. Nghut kôlhang, góbâng matú gi,

'Wú to kôlhang, a myàng kó sháng, gyô nyi kôlhang, a sê gyo kó sháng.'[☆]
ngû, ngò dangtú dông taí lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê. ¹² Hkyô má gyó âng é kyôshi gi, haî eq wuí lhê lhú gâ le, haû mungdang lé byu pé wó gyô é htâng má, lumjíng é má le, hkyi yu é má le, a jé kó sháng gaq ga luí, yhangmoq é i-myit hkaû mai nat Tsadán èq mungdang haû lé, lé yu pyâm é hui bang eq wuí lhê. ¹³ Luqgok yò pé má gyó âng é kyôshi gi, haî eq wuí lhê lhú gâ le, haû mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lumjíng luí, gunglaú huí é nyi má,

☆ 8:10 Esai 6:9

dum htak ló byuq é bang eq wuí lhê. ¹⁴ Zuggyóm má gyó âng é kyôshi gi, haî eq wuí lhê lhú gâ le, haû mungdang lé gyô yù luî, yhumsing é asak dui e ló é hkyô má, shí ipyat lhê é myit wuí myit hke hkyô, ngùn zè sutgan eq mingkan ngón hkyô má myup byuq luî, mo é ashî a zuî é bang eq wuí lhê. ¹⁵ Hpún bo é myigùng má gyó é kyôshi kúm gi, haî eq wuí lhê lhú gâ le, haû mungdang lé lhumzui luî ge é i-myit èq ban gyô yù mù, ging tíng shoq zuî zìng luî, wó jân é i-myit èq ashî zuî é bang eq wuí lhê.

Myibung Htûn É Hkyô

Mrk 4:21-25

¹⁶ Myibung lé tap mù, aû èq nghop tô é le, yhup-chong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haî le a joq, a sé a byông htoq loshoq wó zaú tô é zè le haî a joq nghut ri. ¹⁸ Haû mù luî, nungmoq hkâsu wó gyô yu é hkyô lé sidiq nyî keq, haî mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mâ é lé lháng, yu pyám byi shirâ nghut lhê." ga taî ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haú hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lúm chyûn chyap to kômù, Yhâng chyáng a wó wang é kó nghut ri. ²⁰ Haú hkûn, Yhang lé, "Náng nu eq nunggu pé gi, nang lé hui naû luî, shinggan má lánng yap bum akô." ga taî kyo akô.

²¹ Yesuq gi, yhangmoq lé, "Garai Gasâng é mung-dang lé gyô yù luî, châng é bang gi, Ngá nu eq Ngá gû pé nghut akô." ga luî, yhangmoq lé tû taî kat ri.

Laidun Mó Lé Yesuq Lhoq Zîm É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga taî luî, lhaî má wàng mù gû dap e ló akô.

²³ Yhangmoq gû dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luî, lhaî má wuî byíng lô mù, yhangmoq myup shî râ su dut lò nyi bekô nghut ri.

²⁴ Haú mù, yhangmoq gi, Yesuq chyáng huî ê luî, Yhang lé nhaú pun mù, "Yhumsíng ê, Yhumsíng ê, nga-nhúng myup ló nyi ri." ga taî akô.

Haú hkûn, Yhang toq luî, laidun eq wuîlhêng pé lé tân kat jáng, haú pé gi, zim za dut ló byuq bê.

²⁵ Haú mù, Yesuq gi, "Nungmoq é lumjíng myit gi, hkâmá nghut akô lhú?" ga luî, yhangmoq lé myî ri.

Yhangmoq kúm gi, gyuq maú byuq bùm kôluî, "Shí yuq gi, hkasû é byù nghut lhê lhà? Yhang hkunmó hkyó jáng, laì eq wuîlhêng pé lháng gyo byi ri-nhung!" ga luî, rayuq eq rayuq myî lhùm bum akô nghut ri.

Nat Lé Hkat Htoq Byî É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile mau tû tap mâ é Gerase byu pé é mau má jé dap e ló bekô. ²⁷ Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhùm má le a nyi é za, mebu a dap é, lupdùng má myáng myáng

nyi nyi sù nghut ri. ²⁸ Haú yuq gi, Yesuq lé myàng jáng, wut garu luí, yhâng é hkyí wang má paí gop to mù, "Myhang htàng é Garaí Yhangzo Yesuq é, Náng gi, ngò eq haí séng lhê lhú? Ngo lé a zing-ri rá matú, ngò nang lé dúng nyi lhê." ga luí, htê mó èq taí garú nyi ri. ²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló rá matú, tân pyâm é yanmai nghut ri. Byù haú yuq lé nat gâng èq adàm dàm wang júng hkangmó, loq eq hkyí má toqjâng tuí èq tuí shung, kyum xâng tô é eq, zúng tô é nghut kôlháng, lêng hpyit pyám pyám kut é htoq ago, nat gâng èq yhang lé yoso hkaú shut lêngmháp yù yù kut nyi ri.

³⁰ Yesuq gi, yhang lé, "Náng myíng haí gâ lhê?" ga myí kat é hkûn, yhang gi, "Legio* gâ lhê." ga tû taí ri. Haí mù gâ le, yhâng chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htûm é Lasang-dong shut a kôn kat rá matú, Yesuq lé chôm dúng nyi bum akô.

³² Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pè chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pè chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpang dín ló kômù, myuq hkaú mâ é bang eq awúi

* **8:30** Legio gâ é lichyúm gi, gyezo 4000 eq 6000 gyoro bo é gyedap lé taí ri.

ayàm mâ é bang lé ló taî kyô akô nghut ri. ³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut tò luî, byù gè rayuq su zùng to lánq é lé myàng kômù, gyuq dan bùm bekô nghut ri. ³⁶ Nat dap sù lé hkâsu kut luî lhoq ge yu é hkyô lé myang é bang gi, góbang lé taî kyô akô nghut ri. ³⁷ Haú hkûn, Gerase byu pè é mau mâ é lhunglhâng bang gi, gyuq dan dik kôluî, Yesuq lé yhangmoq é mau mai htoq ló byuq râ matú, chôm dúng tóngbán akô. Haú mù luî, Yesuq gi, taû ló byuq râ matú lhai má wàng bê nghut ri.

³⁸ Nat htoq byuq huî é sù gi, Yesuq htâng cháng râ matú, Yesuq lé dúng tóngbán ri. ³⁹ Nghut kôlhâng, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taî kyo aq." ga luî, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taî kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuî, Galile byu pé gi, Yesuq dum taû lò râ lé lánq nyî kô é nghut mù, Yhang dum taû gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuq luî, yhâng yhûm má lé râ matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haû mù, Yesuq cháng e ló le, shiwa byu pé gi, Yhang lé záng htûng lo bum akô. ⁴³ Haú u lé, raxe í zân sui yuí luí ngunzè lhungháng ban pyám shoq chi sará pè chyáng yâ wú kôlhang, hká yuq le a wó yâ gè byi é† myiwe myhí rayuq le haú hkaû má bo tô ri. ⁴⁴ Myiwe haû gi, Yesuq é nunghtáng má huí lé mù, Yhâng é bushi htâng má ê záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunghâng bang gi, a sé ga he nyi bùm kô é hkûn lé, Petruq gi, "Yhumsing ê, shiwa byu pé gi, náng é lhîngkyuq mai náng chyáng chyîn chyap wang lo bùm kô é yanmai, nang lé záng bekô râ nghut lhê?" ga taî ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri." ga taî ri.

⁴⁷ Haú jáng, myiwe myhí haû gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luí, haî mù Yhang lé záng é hkyô eq, hká dòng ge ló byuq é hkyô pé lé, shiwa byù banshoq bâng é hí má Yesuq lé taî kyô nyi ri. ⁴⁸ Yesuq gi, "Ngá zo ê, náng é lumjîng myit gi, nang lé lhoq gè byi bê nghut ri, ngón za ló aq hkoi!" ga luí, myiwe haû lé taî kat ri.

⁴⁹ Yesuq gi, dang ru taî nyi ashî hkûn, tarajong má up sù Ya-iruy é yhûm mai byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyî lo." ga luí, Ya-iruy lé taî kyô ri.

† **8:43** Ngunzè lhungháng ban pyám shoq chi sará pè chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bô.

⁵⁰ Yesuq gi, dang haû lé wó gyo jáng, "Hkâgyuq, za lumjínq aq, haû jáng, yhang ge byuq râ nghut lhê." ga luí, Ya-iruoq lé taí ri.

⁵¹ Yesuq gi, Ya-iruoq é yhûm má jé é hkûn lé, Petruq, Yohan, Yakuq, eq haû myiwe zô é yhângnu eq yhângwa mai lai luí, yhûm haú má, ó lé le a wàng nhâng kut ri. ⁵² Haú u lé, lhunglhâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaû kó, yhang shi byuq é a nghut, yhup myhî tô é sheq ru nghut lhê." ga luí, yhangmoq lé taí ri.

⁵³ Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byî akô.

⁵⁴ Yhang kúm gi, myiwe zo hau é loq má zuí to mù, "Zoshâng ê, toq aq." ga taí kat ri. ⁵⁵ Haú mù luí, yhâng woi-nyí dum taû wàng mù, haú hkûn jáng toq yap ri. Haú jáng, Yesuq gi, zoshâng haû lé zôjung byi keq, ga yhangmoq lé taí kat ri. ⁵⁶ Haú myiwe zô é yhângnu eq yhângwa nhik gi, gyai maú byuq akô. Nghut kôhang, Yesuq gi, haú dut é hkyô ó lé le a taí kyo râ matú, yhangnhik lé taí hkûm tô ri.

9

Lagyo Raxe Í Yuq Lé Nhang Htoq Kat É Hkyô Mht 10:5-15; Mrk 6:7-13

¹ Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byî ri. ² Hau htâng má, Garai Gasâng é mingdán hkyô hko kyo râ eq, nòhpyo lhoq gê byi râ matú nhang htoq kat

ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwûn hkâchûng kó. ⁴ Nungmoq hká yhûm má wàng kôlhang, haú wâ mai dum htoq ló é buinyì jé shoq, haú yhûm má za nyi nyi keq. ⁵ Nungmoq lé a lhom hap yu é bang lé gi, yhangmoq é wà mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má ko hkyô pyâm to keq." ga taí kat ri. ⁶ Haú mù, yhangmoq gi, htoq e ló luí, wà hkang wà mó má haú gabú danglù hko kyo uchyang, hká jé hkâmá nòhpyo lhoq gê byî wún akô.

Herut Maú Úng-âng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mauzau Herut wó gyô yù luí myit wuî nyi ri. Hkâsu mù gâ le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haú mai, ra-am gi, hí hpyang lhê é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shî í wá taí byông bùm kô é gi, ó wá nghut lhê lú?" ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taú lo é hkûn, yhangmoq kut laí lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuî chûng mù, Bet-saida gâ é wà mó shut tsik za e ló byuq ri. ¹¹ Shiwa byu pé gi, haú hkyô lé châng sé kômù, Yhâng htâng châng

e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nòhpyo gè naù bang lé, lhoq gê byí ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haù shíwa byu pé lé, awui ayàm mà é yhùm pé eq wà pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri." ga luí, Yhang lé taí akô.

¹³ Haù hkûn, Yesuq gi, "Nungmoq, yhangmoq lé rajung jung byi tso keq." ga tû taí ri.

Yhangmoq gi, "Shí myhô bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baú lhang ngo hkyíng kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq rajung za, banshoq bang lé zùng nhang to bekô. ¹⁶ Haù hkûn, Yesuq gi, haù muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haù lé ajap jap hpé luí, shíwa byu pé lé, châng to byi râ matú, Yhâng é chángzô pé lé byi kat ri. ¹⁷ Haù hkûn, yhangmoq banshoq bang zô gyí bùm kô é htâng má, haù chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri.

Yesuq Gi, Hkrisduq Nghut Lê Ga Petruq Taí É Hkyô

Mht 16:13-28; Mrk 8:27—9:1

¹⁸ Radàm lé, Yesuq gi, Yhang baú kyûdûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taî akô lhú?" ga myî ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqh-toi rayuq yuq dum dui toq lo é nghut ri ga, taî akô." ga luí, yhangmoq tû taî akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myî ri.

Hau hkûn, Petruq gi, "Nàng gi, Garai Gasang nhâng byî é Hkrisduq nghut ri." ga tû taî ri.

²¹ Shí hkyô ó lé le a taî kyo sháng gaq ga, Yesuq, yhangmoq lé taî hkûm pyâm ri. ²² Haû mù, Yhang gi, "Haû Byu Yhangzo gi, zing-rî é myo myo hui zo luí, suwún wuî, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghú râ buinyì má, lhoq toq yu é hui râ nghut lhê." ga taî ri.

²³ Hau htâng, banshoq bang lé Yhang dum xoq taî é gi, "Ngá htâng cháng naù sù ó yuq nghut kôle, yhumsing gùng yhumsing he-ngik pyâm mù, nyí wuî yhumsing é tapzîng lé waq chûng* luí, cháng ra râ nghut lhê. ²⁴ Hkâsu mù gà le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. ²⁵ Byù gi, mingkan gón lé wó sing to kôlhang, yhumsing é asak woi-nyí sùm byuq é

* **9:23** Tapzîng lé waq chûng nghu é gi, Yesuq é yanmai jamjau hui é lé taî é nghut lhê.

nghut le gi, yhang é matú, haî akyû bò râ lhu? ²⁶ Ngò eq Ngá é dang lé, lhom hap yù râ lé hoq é sù ó yuq lé le, haû Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, haû chyoiyúng maumang lagyô pê é hpungwup shingkâng èq jé lé é hkûn, hoq pyám râ nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shî kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô
Mht 17:1-8; Mrk 9:2-8

²⁸ Dang haû taî é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. ²⁹ Kyû dúng nyí le, Yesuq é myoqdong gi, ihpyô isâm htaî lò mù, Yhâng é mebu gi, lhap su duq bang lo ri. ³⁰ Haú hkûn, wú keq, Mosheq eq Eliyaq gi, hpungwup shingkang eq htoq lé lô luí, Yesuq eq dâng nyo lhûm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shî hkâm é dông mai dik lò râ nghut é hkyô lé taî lhûm nyi akô. ³² Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô. ³³ Haû nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing é, shí jowò má nga-nhúng nyi le ge ri, haû mù, Nâng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taî kat kôlhang, yhang haî taî nyi é lé, yhang a sé.

³⁴ Petruq dang taî nyi ashî hkûn lé, mhut jé mù, yhangmoq lé htup zíng lo nyi ri. Mhut haû htup lo nyi é yanmai, yhangmoq gi, gyuq byuq akô. ³⁵ Haû mhut hkaû mai htoq lo é htê gi, "Shí yuq gi, Ngá zo nghut lhê; Ngò hkyin yu é Sû le nghut lhê; Yhâng é dang gyo keq." gâ ri. ³⁶ Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yoq má, ó lé le a taî kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byi É Hkyô

Mht 17:14-18; Mrk 9:14-27

³⁷ Hau htâng nyi, yhangmoq bùm haû mai gyó ló kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mâ é byù rayuq wut garû htoq ló é gi, ³⁹ "Sarâ ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rí yù yù kut nyi ri. ⁴⁰ Nat haû lé hkat pyám byi kó laq nghû luî, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

⁴¹ Haû mù luî, Yesuq gi, "Lumjúng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lú? Nung zo lé, shí shut shuí lé lô aq." ga tû taî ri.

⁴² Zoshâng haû, lé lo nyi le lhang, nat gang gi, yhang lé lhoq lhêng to mù langhtân nhang ashî. Yesuq kúm gi, haû agè ashop é nat lé tân kat luî, zoshâng haú lé lhoq gê byi mù, yhâng wa lé dum

ap byî ri. ⁴³ Nyi mi-nyî gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haû lé maú nyi bùm kô le, Yesuq gi, ⁴⁴ "Haû Byu Yhangzo gi, byu pê é loq má ap pyâm é hui zo râ nghut lê. Dang shí hkun lé nungmoq é no má rago gyô wun to keq." ga luî, chángzô pé lé taî ri. ⁴⁵ Yhangmoq kúm gi, dang haû lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luî, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sû nghut lê lhú ga, rayuq eq rayuq taî myíng myô lhùm nyi akô. ⁴⁷ Yesuq kúm gi, yhangmoq é unghkaû má myit nyi é hkyô lé sé byi luî, zoshâng rayuq lé shuí yù mù, Yhâng nàm má shap to luî, ⁴⁸ "Shí zoshâng lé Ngá é myíng mai hap sû ó yuq nghut kôle, Ngo lé hap yu é sû nghut bê; Ngo lé hap yù sû ó yuq nghut kôle, haû Ngo lé nhang kat é Sû lé hap yu é le nghut lê. Haû mù luî, nungmoq banshoq má, je tiq sû gi, je ko sû nghut lê." ga luî, yhangmoq lé taî ri.

⁴⁹ Haú hkûn, Yohan gi, "Yhumsîng ê, Náng é myíng lánng luî, nat gâng pé lé hkat pyám byî wún é byù rayuq lé, ngamoq myang ri. Yhang gi, ngamoq chyáng a lòm sû nghut é yanmai, yhang lé ngamoq hkûm pyâm é nghut lê." ga taî ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sû gi, nungmoq é

hkyam shut nyì sù nghut lhê." ga luî, yhang lé tai ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuî, Yesuq gi, Yhang lé mauhkûng shut shuí toq yû râ buinyì chyâng lò bê nghut mù, Yerusalem wà mó shut ê râ lé myit hpyit to luî, Yhâng é hí má lagyo nhang kat ri. ⁵² Lagyo haú bang gi, Yhâng matú râ é hkyô lajang láng râ ga, Samariq wà rawà má wang ló akô. ⁵³ Nghut kôlhang, Yesuq gi, Yerusalem wà mó shut lai e ló é sù nghut é yanmai, haú wâ bang gi, Yhang lé a lhom hap yù kó. ⁵⁴ Haú hkûn, lagyo Yakuq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhu?" ga luî, Yesuq lé myî akô. ⁵⁵ Yhang kúm gi, lhing wú luî yhangnhik lé, tân pyâm ri, ⁵⁶ haú mù luî, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô Mht 8:19-22

⁵⁷ Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luî, Yesuq lé tai ri.

⁵⁸ Yesuq gi, haú yuq lé, "Wamhkuî pé gi, hkyûng wó akô, ngoq pé le, ngoqsut wó akô. Nghut kôlhang, haú Byu Yhangzo gi, ulhum to jang lhang a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haú yuq gi, "Yhumsîng ê, ngá wa lé, ló yhûm pyám râ ahkáng hí byi shi laq." ga tai ri.

60 Yesuq gi, yhang lé, "Shî bê bang† gi, shî bê bang yhangchang yhûm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taí ri.

61 Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga taí ri.

62 Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé taí ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

1 Hau htâng má, Yhumsîng gi, gotû chángzô pé nyhit xê yuq* lé hkyin yù mù, Yhang e ló râ wà eq jowò hkangmó shut í yuq razúm zúm kut luí, Yhâng é hí má ê nhang kat ri. 2 Yesuq gi, yhangmoq lé, "Kyô† shû yù râ myo shoq joq kôlhang, mù zui râ byù gi, shaû nyi ri. Haû mù, haû kyô Yhumsîng lé, Yhâng é kyô yò má, kyô shu byù‡ myo myo nhâng byi râ matú, dung keq. 3 Nungmoq e ló keq! Wamhkui hpúng má nhang hâng kat é sau zô pé lé su, Ngò, nungmoq lé nhang kat é nghut lhê. 4 Ngùn htung eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

† 9:60 Shî bê bang gâ é gi, woi-nyí má shi to bang lé gâ lhê.

* 10:1 Chyúmdang ra-am má gi, chángzo nyhit xê í yuq ga le kê tô ri. † 10:2 Kyô nghû é gi, Yesuq lé lumjîng nàu kôlhang taí kyo râ

bang a nyi luí láng tô é bang nghut ri. ‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri.

⁵ Nungmoq gi, hká yhûm má wàng e ló kô le, 'Shi yhûm nguingón nyî sháng gaq.' nghû luî, hí taí keq. ⁶ Haú yhûm má nguingón hkyô eq gingdán sù nyî é nghut le gi, nguingón hkyô haû gi, haú yuq é ahtoq má joq to râ nghut lhê. Haû a nghut jáng, nguingón hkyô haû gi, nungmoq chyáng dum taû lo byuq râ nghut lhê. ⁷ Haú yhûm má nyi to mù, yhangmoq haî byî le haî zo haî shuq keq; hkâsu mù gâ le, mù zui sù gi, zuihpau wó yû gíng lhê; haû mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo keq, shuq keq. ⁹ Haú mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luî, yhangmoq lé taí kyo keq. ¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haú wâ mâ é hkyô mó má htoq é mù, ¹¹ 'Ngamoq é hkyî má dap tô é nungmoq wà mâ é hpuilhaû lhang, nungmoq lé hkyang pû tsô nyî râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luî taí keq. ¹² Ngò, nungmoq lé taí kôlé, haú buinyî§ lé, haú wâ gi, Sodom wà htoq má je hpuzo râ nghut lhê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le

§ **10:12** Haû buinyî gâ é gi, Garai Gasâng tarâ jéyáng é buinyî lé gâ lhê.

gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut zung ngûng to bekô râ nghut lhê. ¹⁴ Haû mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê. ¹⁵ Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê." ga taí ri.

¹⁶ Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taû Jé Lo É Hkyô

¹⁷ Hau htâng, haû chángzo nyhit xê yuq gi, gabú myit eq dum taû lò mù, "Yhumsîng ê, náng é myîng lé lang jáng, nat gâng pé lháng ngamoq é dang lé gyô bum akô." ga taí akô.

¹⁸ Haû su ga taí kôjáng, Yesuq tû taí é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. ¹⁹ Wú keq! Ngò gi, nungmoq lé, lhangmùi eq gogok pé lé wó nang râ eq gumlau gyè pê é wum-o a-tsam banshoq lé wó ùng râ ahko ahkáng lé byi bê nghut mù luî, hai eq le nungmoq lé wó lhoq hten râ a nghut lo. ²⁰ Nghut kôhlang, nat pé nungmoq é dang gyô é lé za hkâgabú nyí kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyî keq." ga taí ri.

* **10:14** Nungnhik je hpuzô é hkyô gi, mauhpo kumlhá myo myo myang é nghut kôhlang, myit a lhîng kô é yanmai nghut ri.

21 Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkúng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wuì lé tân shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haú gi, Nàng ô nau é hkyô nghut ri.

22 Ngá Wa gi, lhungháng lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai luí, ó a sé." ga tâi ri.

23 Hau htâng má, Yhâng é chángzô pê shut lhing wú luí, yhangmoq lé baú za haq taí kat é gi, "Nungmoq byu-myâng é hkyô pé lé, myang é myoq pé gi, hkungsô wó nyi ri. 24 Hkâsu mù gâ le, Ngò, nungmoq lé taí kôlé, nungmoq wó myâng, wó gyô é pé lé, myiqhtoî pé eq hkohkam pé myo myo gi, myâng naù gyo naù kôlhang, a wó myâng, a wó gyo kó nghut ri." ga tâi ri.

Gè É Samariq Byù

25 Haú hkûn, wú keq, tarâ sará rayuq gi, toq luí, Yesuq lé, "Sará ê, ahtum abyuq é asak lé wó yû shoq, ngò hkâsu kut râ râ lhê lhu?" ga luí, Yhang lé myî chyam wú ri.

26 Yesuq gi, "Mosheq é tarâ má hkâsu ga kê tô ri lhu? Nàng haú lé hkâsu nghap yu nyi lhê lhu?" ga luí, yhang lé myî ri.

27 Haú yuq gi, "'Haú Yhumsîng náng é Garai Gasang lé, náng é myit nhikhum banshoq, náng

é asak woi-nyí lhum gón, náng é wum-o ban-shoq, náng myit é hkyô banshoq eq, chyitdap râ lhê;✠ 'náng gûng lé nàng chyitdap é su, náng é chyangnâm mâ é bang lé le chyitdap aq.✠" ga tû taí ri.

²⁸ Yesuq gi, "Nàng tû taí é dang jô ri; haû su yhang kut aq, haû jáng nàng gi, asak duì râ nghut lhê." ga yhang lé taí ri.

²⁹ Nghut kôlhang, haú yuq gi, yhâng gungdu dingmán é lé, tûn shit naû luí, "Ngá é chyangnâm mâ é sù gi, ó yuq nghut lhê lhú?" ga luí, Yesuq lé myí ri.

³⁰ Yesuq tû taí é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htûng huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyám to kôluí ló byuq bekô. ³¹ Haú u lé, hkyangjong rayuq gi, haú hkyô mai laí âng ló le, haû damyaq hui sù lé myàng jáng, koi laí ló byuq ri. ³² Haû eq rajung za, Lewiq rayuq le, haû mai laí ló é hkûn, haú yuq lé myàng jáng, koi laí ló byuq ri. ³³ Nghut kôlhang, Samariq byù rayuq le, haû mai laí ló é hkûn, haú yuq leq tô é lé myàng jáng, wú shogyo luí yhâng chyáng huí ê mù, ³⁴ yhâng é dà m á, xù eq tsibiyiq wing shoq gyun luí, rago za htup byi mù, yhâng é logúng má, haú yuq lé bún ke luí, bing-yhûm ralhum má jé shoq shuí ló mù, gôn lajang byí ri. ³⁵ Htang nyí lé, yhang gi, haû bing-yhûm yhumsîng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gùng má nàng myo chung

záng é banshoq lé ngò dum taû lò jáng, lo xap râ.'
gâ ri." gâ ri.

³⁶ Hau htâng, tarâ sará lé, "Nàng gi, byù haú bang
sum yuq má damyaq huí sù é chyangnâm mâ é
dông nghut sù gi, hká yuq nghut râ su ngam ri
lhú?" ga luí, Yesuq myî ri.

³⁷ Haû tarâ sará gi, "Haú yuq lé shogyo sù nghut
ri." ga taí ri.

Yesuq gi, "Nàng le haú dông ló kut aq." ga luí,
yhang lé taí kat ri.

Mariq Eq Mahtaq Nhik Chyang Yesuq Ê Jé É Hkyô

³⁸ Ahkuí, Yesuq eq Yhâng é chángzô pé hkyô xoq
sô e ló kô le, wà rawà má jé wang ló é hkûn, Mahtaq
gâ é myiwe rayuq gi, Yesuq lé yhâng yhûm má
lhom te yu ri. ³⁹ Mahtaq gi, Mariq gâ é yhanggu
myiwe zo rayuq wó ri. Mariq haû gi, Yhumsîng
Yesuq é hkyî wang má zung to mù, Yhang mho-
qshit é dang lé gyô nyi ri. ⁴⁰ Mahtaq kúm gi, saí tso
saí huq é amû myo luí, gyin bûn nyi ri. Haû mù luí,
yhang huí ê mù, "Yhumsîng ê, ngá gu gi, saí tso saí
huq é amû má, ngo lé baú za rap kut tô é lé, nàng
a bo myàng byi lhú? Ngo lé, lé garúm sháng gaq,
yhang lé taí byi laq." ga luí, Yesuq lé taí ri.

⁴¹ Haú hkûn, Yhumsîng gi, "Mahtaq, Mahtaq,
nàng gi, muzó lé za ma nyi mù, myit myo myit chiq
é huí nyi ri. ⁴² Nghut kôlháng, je ahkyak é hkyô gi,
rahkat za nghut lhê. Mariq kúm gi, haû je ge é hkyô
lé hkyin yù bê nghut ri. Haû lé yhâng chyang mai
wó yu pyám byi râ a nghut." ga luí, yhang lé tû taí
ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsîng ê, Yohan gi, yhâng é chángzô pé lé kyûdung râ hkyô mhoq byî é su, ngamoq lé le mhoq byi laq." ga Yhang lé taí ri.

² Haú hkûn, Yhang gi, "Nungmoq kyûdung le, 'Mauhkûng htoq tsáng myhâng mâ é ngamoq é Âwa ê,

Náng é myîng gi, chyoiyúng nyí sháng gaq.

Náng é mingdán jé lô sháng gaq.

³ Ngamoq nyí wuí râ é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byî é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.' nghû keq." ga luí, yhangmoq lé mhoqshit ri.

⁵ Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é nghû sháng, yhang gi, gunggâm yoq má haú yuq chyáng ê luí, 'Buinùm hpó ê, ngo lé muk sùm long byam chyí byî kat laq, ⁶ haí mù gâ le, ngá buinùm rayuq byìn we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga taí é hkûn, ⁷ yhúmhaú shut mâ é sù gi, 'Ngo lé, hkálé lhoq hkyik lo, hkum le myhî pyám bê, ngá zoshâng wuí le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri. ⁸ Ngò, nungmoq lé taí kôlé, buinùm nghut

é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yú byi râ nghut lhê.

⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. ¹⁰ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq îwâ pé má, ó yuq wá, yhumsing yhangzo muk dúng le, luqgok byi kó râ lúh? Ngozo dúng le, lhangmuì byi kó râ lúh? ¹² Woq-ú dúng le, gogok byi kó râ lúh? ¹³ Agè ashop é bang nungmoq lháng gi, nungmoq é zo wuí lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang haú Chyoiyúng Woi-nyí byi râ nghut lhê." ga taí ri.

*Mara Hûn É Dang Lé Yesuq Tû Taí É Hkyô
Mht 12:22-30, 43-45; Mrk 3:20-27*

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô. ¹⁵ Nghut kôlhang, yhangmoq chyáng mâ é ra-am gi, "Yhang gi, nat gâng pê é zau Bezebulaq é wum-o a-tsam èq za, nat gâng pé lé wó hkat pyâm é nghut ri." ga taí bum akô nghut ri. ¹⁶ Ra-am le, Yhang lé,

mauhkûng mâ é kumlhá tûn shit wú laq ga dúng chyam wú akô.*

17 Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum nghut kôle, hten byuq râ za nghut lhê; haû eq rajung za, ikun byù yhangchang rayuq eq rayuq byoq lhûm é yhûm htu gi, byoq gângh lhum râ za nghut lhê. 18 Nat pé le yhangmoq yhangchang byoq gângh lhûm nyi kô é nghut le gi, Tsadán é mingdán gi, hkâsu kut wó gângh to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gângh pé lé hkat pyâm ri ga kô é yanmai nghut lhê. 19 Ngò gi, Bezebulaq é wum-ô èq za, nat gângh pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gângh pé lé hkat pyâm kô é nghut lhê lhú? Haû mù luí, yhangmoq gi, nungmoq lé jéyáng é bang dut bekô râ nghut lhê. 20 Nghut kôlhang, Ngò gi, Garai Gasâng é wum-ô èq nat gângh pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

21 Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. 22 Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luí, yhâng é

* **11:16** Byu pé gi, Yesuq lé Garai Gasang nhang kat é hkyô lé saksé myàng naù luí, mauhpo kumlhá dúng nyi akô. † **11:20** Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkanq é lé gâ é nghut lhê.

sutzè pé lé, gam yu pyám byi râ nghut lhê.†

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

²⁴ Haû agè ashop é nat gi, byù rayuq chyáng mai htoq ló mù, kyuq huì é jowò pé má sô yông e ló luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi laí lo é yhûm má dum taû ló wú râ.' ga taí ri. ²⁵ Yhang dum taû jé ló wú le, yhûm haû gi, shum pyám mù san za rago dut to lánq é lé ló myang ri. ²⁶ Haû jáng, yhang gi, dum taû é mù, yhâng htoq je wuí é nat nyhit nat lé shuí lò luí, haú má lo wàng nyi to bekô. Haû mù, haú yuq é nyi yap sâmlai gi, hí lhê htoq má je wuí lò bê nghut ri." ga taí ri.

²⁷ Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó eq Yhang lé taí é gi, "Nang lé wun é ùng wam eq nàng shuq é nauwang gi, hkungsô wó nyi ri ô!" gá ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotú haí le tân shit râ a nghut. ³⁰ Yonaq gi, Ninewe wà

† **11:22** Haû eq rajung za, Yesuq gi, Tsadán lé zân ùng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri.

byù pè hí má kumlhá§ dut é su, haù Byu Yhangzo gi, shí pyat lhê é byu pè hí má, kumlhá dut râ nghut lhê. ³¹ Maupyî mã é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haù tarâ jéyáng é buinyì má, shí ipyat mã é byu pé eq rahá toq lô luí, yhangmoq lé mara hùn râ nghut lhê. Wú keq, Sholumon htoq ko sù gi, ahkuí shí má jé nyi to bê. ³² Ninewe wà byu pé gi, Yonaq, mungdang hko kyô é hkùn myit lhíng kô é nghut mù, tarâ jéyáng é buinyì má, shí ipyat eq rahá toq lô luí, yhangmoq lé mara hùn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô.

³⁴ Náng é myoq gi, náng gungdû é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê.

³⁵ Haù mù, náng chyáng bo é maubó gi, mauchut byuq é, a chut byuq é lé wú nyi aq. Náng lumjíng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragùngdu gón má

§ **11:30** Kumlhá gi, Yonaq, ngozô wamdaù mã sum nyí lúng é su, Yesuq le, shí bê mai sum nyí nghù râ nyí mã, dum dui toq lô râ hkyô lé taí nau é nghut ri. * **11:34** Myibung gâ é gi, tengmán é mungdang lé wó sê yu é a-tsam lé, taí é nghut ri.

duqbo é nghut le gi, rawò má le mauchut é jowò a joq é za, myibung nang lé duqbo byi nyi é su, náng gungdu gón má duqbo nyi râ nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haú su ga ban taí é htâng má, Hparishe rayuq gi, yhang eq zang rahá zo râ matú, Yesuq lé ji ri. Haú mù, Yesuq gi, haú yhùm má wang ê mù zang zo râ ga siboí nàm má zung tô ri. ³⁸ Nghut kôlhang, Hparishe wá gi, zang zo râ hí má Yesuq loq a chí é lé, myàng luí maú nyi ri.†

³⁹ Haú mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyi kômù, nungmoq é unghkaú má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte‡ lé le, ahtoq§ lé le, saí sù gi, Garai Gasang rayuq za nghut é lé, a sé kó lhú? ⁴¹ Nghut kôlhang, ahte má bo é zè pé lé, ra châ é bang lé byi pyám keq; haú hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsang, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyám tô akô. Xê gambùm ragambùm byi

† **11:38** Yudaq htûng tarâ má gi, zang a zo shi má loq chi râ lhê.

‡ **11:40** Ahte gâ é gi, i-myt unghkaú lé taí ri. § **11:40** Ahtoq gâ é gi, gungdu lé taí ri.

é lé le cháng luî, tarâ dingmán é hkyô eq Garai Gasang lé chytđap é hkyô lé le, kut nyî râ lhê.

⁴³ Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gài pé mã hkunggâ é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luî, ahtoq mai sô lai é lupdùng eq du akô." ga taî ri.

⁴⁵ Haú hkûn, tarâ sará rayuq gi, "Sarâ ê, nàng haú su gâ é gi, ngamoq lé le rhoi lhôm nyi é nghut bê." ga Yhang lé tâ taî ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wuî é noqkuq htùng tarâ wôlai lé wùn nhâng luî, yhumsíng yhang gi, wò haú lé loqnyhuî eq lháng, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gâ le, nungmoq gi, nungmoq é íchyí îwâ pé sat pyâm é myiqhtoî pé é lup lé luptsuq tsuq akô. ⁴⁸ Haú mù luî, nungmoq gi, nungmoq é íchyí îwa pé é muzó lé, myit bo huî é bang nghut nyi akô. Hkâsu mù gâ le, yhangmoq gi, myiqhtoî pé lé sat pyám mù, nungmoq gi, lup haú pé lé luptsuq tsuq akô. ⁴⁹ Haú mù luî, Garai Gasang, Yhâng é hpaqchyî byéng-yá mai taî é gi, 'Myiqhtoî pé eq lagyô pé lé, ngò yhangmoq chyáng nhang kat râ nghut lhê; haú bang mâ é ra-am lé gi, yhangmoq lhom sat pyám mù, ra-am lé gi, zing-ri kó rá nghut lhê.' gâ ri. ⁵⁰ Haú su mù luî, mau htoq xâng hkûn lhê é, Abelaq é sui mai, hkungga gyap eq noqkuq yhûm gyoro má sat pyám huî é Zahkariq é sui jé shoq, shun

pyâm é myiqhtoî pê é sui banshoq bâng é manglat gi, shí pyat mâ é byu pé lé hûn râ nghut lhê. ⁵¹ Ngò, nungmoq lé taí kôlé, manglat haú pé lé gi, shí pyat mâ é byu pé lé, gè gè yhang hûn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsíng yhang le a sé, sé naû bang lé le, hkûm zing tô akò nghut ri." ga taí ri.

⁵³⁻⁵⁴ Yesuq haû mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuî é dangmyi myo myo myi luî, gyám wú nyi akò nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haû u, byù hkyíng mun zup zîng lò mù, rayuq eq rayuq lháng záng nâng lhum shoq dut nyi é hkûn, Yesuq, Yhâng é chángzô pé lé taí hi é gi, "Gegùn labyoq kut é Hparishe pê é múnchi lé koi sidiq pyám keq. ² A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³ Haû mù luî, nungmoq, mauchut hkaû má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaû má, dangsoq soq é lé le, yhumhkûng htoq mai taí pyo bùm bekô râ nghut lhê.

⁴ Ngá buinùm wuî ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó. ⁵ Nghut kôlhang,

nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngaraí ming shut wó hkyô kat pyâm é a-tsam wó sú lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyí keq. ⁶ Johkyáng ngo du lé, gyi htingchap í chap èq wó ûng pyâm lhê a nghut kó lhú? Haú johkyáng radu lé lháng, Garai Gasang gi, tô-myhî pyâm é a nghut. ⁷ Garai Gasang gi, nungmoq é ulhum mâ é xâm banshoq lé lháng, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lháng gù je bo é bang nghut lhê.

⁸ Ngò, nungmoq lé taí kôlé, byu pê hí má Ngo lé lhom yín yu é sú ó yuq nghut kôlé, Garai Gasâng é maumang lagyô pê é hí má, haú Byu Yhangzo gi, haú yuq lé lhom yín yû râ nghut lhê. ⁹ Nghut kôlháng, byu pê é hí má Ngo lé he-ngik pyâm é sú lé chyaú gi, Garai Gasâng é maumang lagyô pê é hí má, he-ngik pyám râ nghut lhê. ¹⁰ Haú Byu Yhangzo lé dang dông shut é sú gi, mara hkyut byî é wó hui ra nghut lhê; nghut kôlháng, haú Chyoiyúng Woi-nyí lé rhoi dang taí pyâm é sú gi, mara hkyut byî é hui râ a nghut.

¹¹ Byu pé nungmoq lé jéyáng râ matú tarajong pé má le, agyì suwún wuí eq ahkáng ayá wó bâng é hí má le, shuí e ló kô é hkûn, hkâsu kut râ lé le, hkâsu nghû tû taí râ lé le, hkâ-myt chiq kó. ¹² Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhogshit byi râ nghut lhê." ga taí ri.

Hpaqchyî A Bo É Sahtê Hpó Lé Dangtú Yu É Hkyô

¹³ Haú hkûn, shiwa hpúng hkaú mai, byù rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

¹⁴ Yesuq gi, "Byù nàng ê, nungnhik tang ahtoq má tarâ agyi kut luí, ikun zè gàm byi râ gi, ngo lé ó hkyin tô é lhú?" ga luí, yhang lé tú taí ri. ¹⁵ Yesuq yhangmoq lé taí é gi, "Myoqnoq é hkyô banshoq mai, nungmoq é i-myt lé hkûm zìng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶ Dangtú ralhum dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haú mù luí, yhâng é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸ Dum nghut jáng, yhang gi, 'Ngò îsu kut wú râ abe, ngá é chyî xau pé lé hpyoq pyám luí, je kô é chyî pé lé saí râ nghut lhê. Chyî haú pé má ngá é guqzo muilhum pé eq sutzè banshoq lé, tsìng kat to luí, ¹⁹ ngá é i-myt lé îsu nghú taí râ, "I-myt ê, zanwut myáng myáng é matú, zè gè myo myo ngò tsìng to bê. I-myt nàng zim za kut nyi aq hkoi. Zo mù, shuq mù, ngón ngón nyi aq." ga' gâ ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byí é nghut jáng, nàng tsìng hkong tô é zè pé gi, ó yuq é matú dut râ lhú?' ga luí, yhang lé taí ri.

²¹ Haú eq rajung za, yhumsing é matú sutzè hkong to mù luí, Garai Gasâng é hí má myung nyi sù gi, haú yuq su nghut râ nghut lhê." gâ ri.

Myit A Chiq É Za Garai Lé Lumjǐng Râ Hkyô
Mht 6:25-34, 19-21

²² Yesuq, Yhâng é chángzô pé lé dum taí é gi, "Haû mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myit chiq kó.

²³ Asak gi, zoshuq htoq má, gungdu gi, mebû htoq má, je ahkyak lhê. ²⁴ Nghonoq pê é hkyô lé myit wú keq; yhangmoq gi, kyô hkyó kyô shu a kut kó; guqchýi eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pê htoq má je riyhang hpaudap nyi lhê a nghut kó lhú? ²⁵ Nungmoq má, ó yuq wá, myit chiq é eq, yhumsing é asak lé radúng kô wó jat yù kó râ lhú? ²⁶ Haû su mù luí, tiq dik é hkyô lé lhang, nungmoq a wó kut kô é nhîng, haí mù luí gotû hkyô pé lé, myit myô nyi akô lhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mù le a zui, hkyîng le a duì kó nghut ri. Nghut kôlhang, Ngò, nungmoq lé taí kyo kôlé, Hkohkâm Sholumon hpúng kô dik u lé wut é mebu lhang, ban haû rabó lé a hkyit nghut ri. ²⁸ Lumjǐng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé, je riyhang hut râ a nghut kó lhú? ²⁹ Nungmoq gi, haí zo haí shuq râ lé hkâho nyi kó; haû eq séng luí lé hkâ-myit chiq nyí kó. ³⁰ Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Êwa Garai Gasang gi, haú pé lé

* **12:27** Htutbó ban gi, yúng dik é yosô ban nghut lhê.

nungmoq râ é hkyô, sé byî nyi lhê. ³¹ Nungmoq kúm gi, Yhâng é mingdán lé ho nyi keq, haû jáng, haú pé, nungmoq lé puq byi râ nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byí nau nyi ri. ³³ Nungmoq wó é zè pé lé ûng pyám luî, myùng bang lé byi keq, yhumsing é matú a dat xau a dat wôm é ngunhtûng saí luî, hkau sù lé a jé, manot èq le a wó zô é sutzè lé mauhkûng htoq má hkong to keq. ³⁴ Hkâsu mù gâ le, náng é sutzè joq jang má, náng é i-myt le jé nyî râ nghut lhê.

Yesuq Dum Jé Lé Lô Râ Hkyíng Lé Machya Nyî Râ Hkyô

Mht 24:45-51

³⁵ Nungmoq gi, hpyihit hit luî, (mû zui râ matú rì rì kut to keq); nungmoq é myibung lé tuq to mù, ³⁶ myiháng poí mai dum taû lò luî, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wuì su kut nyî keq. ³⁷ Haû yhumsing jé lo le, machya nyì láng é dui-nhâng zoshâng wuì gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haû yhumsing hpó gi, yhangmoq lé yuq zung to nhâng luî, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggàm yoq lé nghut kôhang, woq tân hkûn lé nghut kôhang, haû su kut machya nyi é lé, yhumsing hpó lo myang é nghut le gi, dui-nhâng zoshâng haú bang hkungsô wó nyi ri. ³⁹ Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyì luî, yhâng yhûm lé a

wó hput htong nhâng râ nghut é lé, bûn sê nyi keq.
⁴⁰ Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê." gâ ri.

⁴¹ Haú hkûn, Petruq gi, "Yhumsîng ê, dangtú shî gi, ngamoq lé za, taí é nghut lhê lú? Haû a nghut jáng, lhunglhâng bang lé taí é dông nghut lhê lú?" ga myi ri.

⁴² Haû jáng, Yesuq gi, "Lumgîng é eq hpaqchyî bo é sùt zum sù gi, hká yuq nghut lhê lú? Haú yuq gi, yhâng yhumsîng é dui-nhâng zoshâng wuì lé ahkyíng jé jáng zoshuq gàm byi râ matú, yhumsîng hpô èq hkyin to sù dut râ nghut lhê. ⁴³ Yhumsîng hpó dum taû lo é hkûn, haû su kut nyi lánng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsîng hpó haú gi, yhâng é sutzè banshoq, dui-nhâng zoshâng haú lé ap to râ nghut lhê. ⁴⁵ Nghut kôlhâng, dui-nhâng zoshâng haû gi, yhâng é i-myt unghkaû má, 'Ngá é yhumsîng hpó jé lô râ gyai myáng ashî.' ga myit pyám mù, dui-nhâng zoshâng luzúm wuî myiwe, yuqgè lé nhuq bat é eq, zo yê shuq yê î shuq wut nyi é nghut jáng, ⁴⁶ dui-nhâng zoshâng hau é yhumsîng hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luí a lumjîng bang eq rahá nyhi pyám râ nghut lhê.

⁴⁷ Yhumsîng hpô é i-myt lé sê to kôlhâng, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsîng èq nhuq bat é lé, myo myo hui zo râ nghut lhê. ⁴⁸ Nghut kôlhâng, a sé mù kut shut sù kúm gi, shau za bat é hui râ nghut lhê.

Haû eq rajung za, Garai Gasang gi, myo shoq wó yû su chyáng mai, myo shoq dúng yù rá nghut lhê. Myo myo ap byî tô é hui su chyáng mai, je myo shoq dum dúng yù rá nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lhê. Myi haû dap to lánq é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yù râ é baptisma† rajung joq ashî, haû a hkam yù yù gi, ngò gyai yhang hkâm zo wuî nyi ri. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lúh? Haû dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê. ⁵² Haû su mù, ahkuî mai rayhûm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga taí ri.

Dut Lò Râ Hkyo É Kumlhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é

† **12:50** Shî mâ é baptisma gi, Yesuq, ajung jung hpuzo mù shî hkâm é hkyô lé taí é nghut lhê.

lé myàng jáng, 'Maú wo lò berâ.' ga radá dâm lhaq taí taí mu akô, haû eq rajung za le, dut lò lò mu ri. ⁵⁵ Dum nghut jáng, maupyî shut mâ é lai lo le, 'Bui htân berâ.' ga lhaq taí taí mu akô, haû eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumhá lé, sê gam hkoq yu nyi akô. Haû su nghut kô le nhîng, haí mù luî, shí ipyat mâ é kumhá lé gi, a sê gam hkoq dut tô akô lú?

⁵⁷ Haû eq rajung za, haí mù haû dingmán é hkyô lé yhumsîng yhang yhang a wó doqdân yù kô é lú? ⁵⁸ Dangké, nang lé yui tsuq sù eq rahá, tarâ agyi wá chyáng e ló le, hkyô má yhang eq ngón shoq byîñ hpyé huî yù aq. Haû a nghut jáng, yui yhumsîng gi, nang lé tarâ agyi chyáng ê dé pyám luî, tarâ agyi gi, htóng hkyó su chyáng, nang lé ap pyám luî, yhang gi, nang lé htóng má lhûng pyám râ nghut lhê. ⁵⁹ Ngò, nang lé taí lé, yuichyîñ haû a ban xap xap gi, htóng haû mai nàng wó htoq ló râ a nghut." ga taí ri.

13

Myit A Lhîng Jáng Shi Hten Byuq Râ

¹ Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé taí kyô akô. ² Yesuq gi, "Galile byù haú bang haû su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lú? ³ Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq

bang haû eq rajung za shi hten byuq kó râ nghut lhê. ⁴ Haû htoq agó, Siloam wà mâ é machya gyop gyó luî, nhê sat huî é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú? ⁵ Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri. ⁷ Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haû lé htuoq pyám aq. Haî mù, maumyî aha agó kut yuq nhang tô lhê lhú?' ga luî, tsibiyiq hkyâm zúng sú lé taí ri.

⁸ Hkyâm zúng sú gi, 'Yhumsîng ê, hkûzân za gi, yuq tô wú shi sháng gaq, shigâm hau é lhînghkyuq má ngò du lhîng to mù, myìhpún kat luî bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuoq pyám râ nghut lhê.' ga luî, hkyâm yhumsîng lé tâ taí ri." gâ ri.

Bánno Buinyi Má Gùng Loq Hten Sû Lé, Lhoq Gê Byî É Hkyô

¹⁰ Bánno buinyi lé, Yesuq gi, tarajong ralhummá, mhoqshit nyi ri. ¹¹ Haú hkûn, haú má raxe shit zân tup nat dap luî, gùng loq lhoq hten huî é myiwe rayuq le nyi tô ri. Yhang gi, dàngngóm luî, gungdu ratsuí lháng a wó lhoq nyhâng lô é sù nghut ri. ¹² Yesuq gi, myiwe haû lé myàng jáng,

yhâng chyáng wut yù mù, "Myiwe myhí ê, nàng, nòhpyo mai gè berâ." ga luî, ¹³ yhâng é ahtog má loq ke byî ri. Haú hkûn jáng, myiwe haú gi, nyàng za dum wó yap luî, Garai Gasang lé hkya-ôn nyi ri.

¹⁴ Haú mù, Bánno buinyi lé, Yesuq nòhpyo lhoq gè byî é yanmai, tarajong má up sù gi, wú nhik-yo luî, "Mù wó zuî é buinyi hkyuq nyi joq tô le, buinyi haú pé má, lé wó lhoq ge yù lhê. Haú mù, Bánno buinyi má gi, hkâkut kó." ga luî, shiwa byu pé lé taí kat ri.

¹⁵ Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyi lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lhú? ¹⁶ Haú nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shí lé, Bánno buinyi má Tsadán loq mai, hkyut byi a gíng râ lhú?" ga tû taí ri.

¹⁷ Haú su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amù banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haú hkûn, Yesuq taí é gi, "Garai Gasâng é mingdán gi, haí eq wuí lhê lhú? Ngò hai eq taí kê wú râ lhú? ¹⁹ Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

20 Yhang dum xoq taí é gi, "Garai Gasâng é mingdán lé, ngò hai eq taí kê wú râ l hú? 21 Haú gi, myiwe zo rayuq èq sungsô mún sum búng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong
Mht 7:13-14, 21-23

22 Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byí ri. 23 Haú hkún, byù rayuq gi, "Yhumsíng ê, hkyi yu é hui râ bang gi, shau za nghut râ l hú?" ga luí, Yesuq lé myí ri.

24 Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôlhang, a wó wâng kó râ nghut lhê. 25 Yhumsíng hpó,* hkum toq myhî pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsíng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí râ nghut lhê.

26 Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô râ.

27 Nghut kôlhang, yhumsíng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá

* 13:25 Yhumsíng hpó gi, Garai nghut lhê. Yhúm gi, Garaí é mingdán lé taí é nghut lhê.

chyáng mai gâng ló byuq keq.' ga tù taí kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoî pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luí, haú jowò má ngaubyi ngaù nhap eq zuí kyik kyik shoq hpuzô nyi bùm bekô râ nghut lhê. ²⁹ Hau hkûn, buihtoq, buiwàng, maupyî, mautsûng mâ é mingdán myo myo mai byu pé lé luí, Garai Gasâng é mingdán zoshuq poí má myang zùng kó râ nghut lhê. ³⁰ Haú hkûn, ahkuí htâng gyó nyí bang gi, hí bekô râ; ahkuí hí to bang gi, htâng gyó bekô râ." ga luí, yhangmoq lé taí ri.

Yerusalem Wà Mó Eq Séng Luí, Yesuq Tai É Hkyô

³¹ Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé taí akô.

³² Haú jáng, Yesuq gi, "Hkû-nyí, napmá,† ngò nat gang hkat pyám luí, nò zo hpyo zo lhoq gê byi râ nghut lhê; sum nyí nghû râ buinyi‡ má sheq, ngá mù bàn râ nghut lhê.' nghû luí, agè ashop é wamhkuí haú lé ló taí kyo keq. ³³ Haí wá dut kôlhang, hkû-nyí, napmá, sânghe nyí, ngò gi, e ló râ dut ashî. Hkâsu mù gâ le, myiqhtoî pé gi, Yerusalem wà mó mai lai luí gotú jowò má a shi wú kó nghut ri.

† **13:32** Hkû-nyí, napmá gâ é gi, Yesuq mingkan htoq má mù zui râ ahkyíng lé taí é nghut lhê. ‡ **13:32** Sum nyí nghû râ buinyi gâ é gi, Yesuq mingkan htoq má mù ban zui é buinyi lé taí é nghut lhê.

³⁴ Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé, luqgok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhung yu é su, nungzô pé lé, Ngò hkâ-myhó dâm shuî tsìng yù naù kôlhang, nàng a dóng nghut ri. ³⁵ Wú keq, nungmoq é yhûm gi, nungmoq é matú chamchyuiyui dut pyâm to berâ nghut lhê; Ngò, nungmoq lé taí kôlé; 'Yhumsìng é myìng mai jé lé lo é Sû gi, hkungsô wó nyì sháng gaq.'[☆] nghû, nungmoq a taí taí gi, Ngo lé wó myâng kó râ a nghut lo." ga luî, yhangmoq lé taí ri.

14

Hparishe Rayuq É Yhûm Má Yesuq Jé Nyi É Hkyô

¹ Bánno buinyì ra-nyì má, Yesuq gi, zang zo râ ga Hparishe suwún rayuq é yhûm má, ê wang nyi tô le, haú mâ é bang gi, Yhang lé gyui gyui chôm wú nyi bum akô. ² Haú u lé, wuì wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyì má nòhpyo lé lhoq gê byì é gi, tarâ wang lhê lhú, a wang é lhú?" ga luî, tarâ sará pé eq Hparishe pé lé myì kat ri. ⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zuì to mù, lhoq gê byì luî, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsìng é yhangzo rayuq yuq, haú a nghut jáng, no myang radu du, Bánno buinyì má, wuìhtung má byit gyó le, haú hkûn jáng, a xe htoq yu é za, wó nyì kó râ nghut

☆ 13:35 Hkya-on 118:26

lhê lhu?" ga myi kat ri. ⁶ Yhangmoq kum gi, dang hau hkun le, hai le a wo tu tai ko nghut ri.

⁷ Hau hkun, Yesuq gi, ji to e bang je reng e zung jowò pé hkyin yu nyi ko e le myang jang, yhangmoq le dangtu dong tai e gi, ⁸ "Byu rayuq yuq nang le, myihang poi ma ji e nghut jang, je reng e jowò ma hkâ-e zung. Hkâsu mù gâ le, nang htoq je arong wo su le le, ji to shira abe. ⁹ Ji to e nghut jang gi, nungnhik le ji to e yhumsing hpó le lô mù, 'Shi yuq le jowò hui byi aq.' ga lui, nang le le tai jang, nang hoq hpu lui, hkyi htang shut hui zung ra ra nghut lhê. ¹⁰ Hau mù lui, supé nang le ji le, hkyi htang ma e zung aq; hau hkun, nang le ji su le mù lui, 'Buinum hpó e, shi je reng e jowò ma hui doq zung aq.' ga lui, nang le tai jang, nang eq raha zung to e bing lunglhâng bang e hi ma, nang gi, myoqdong wo ra nghut lhê. ¹¹ Hkâsu mù gâ le, yhumsing gung le waq toq e su o yuq nghut kole, lhoq nyhum pyam e hui ra nghut lhê; yhumsing gung le, lhoq nyhum e su kum gi, waq toq e hui ra nghut lhê." ga tai ri.

¹² Hau htang, Yesuq yhang le ji e yhumsing hpó le tai e gi, "Napzang, a nghut jang, myinxun le nang byi tso nau le gi, nang e buinum wui, âgu âmang pé, mungmoq wui, sut wo e yhumkyo chang pé le hkâi tso. Hau bang le ji to e nghut jang gi, yhangmoq nang le dum ji to e eq, jeju dum tau ko ra nghut lhê. ¹³ Nghut kolang, nang poi kut mù, byi tso byi huq nau e nghut le gi, myung bang, hkyi gyui loq hten bang eq myoqjit e bang le, ji tso aq. ¹⁴ Hau su kut jang, nang hkungsô wo nyi ra nghut lhê. Yhangmoq nang le jeju a wo tau kolang, dingman bang dum dui toq lo e buinyi ma,

hau é akyû lé, nàng wó hkam yù râ nghut lhê." gâ ri.

Zoshuq Poî Mó Lé Dangtú Yu É Hkyô

Mht 22:1-10

¹⁵ Yesuq eq rahá zô zung tô é byù rayuq gi, dang haû wó gyo jáng, "Garai Gasâng é mingdán mâ é zoshuq poî má wó zo râ sù gi, hkungsô wó nyî sù nghut râ." ga luî, Yesuq lé taî ri.

¹⁶ Yesuq haû yuq lé tâ taî é gi, "Byù rayuq gi, myinzang byi tso râ ga, zoshuq poî mó ralhum hen to mù, byù myo myo lé ji tô ri. ¹⁷ Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga é châng wut nhang ri.

¹⁸ Nghut kôlhang, haû bang banshoq gi, zoshuq poî má a ê râ dông chyat he pyâm akô. Rayuq sù gi, 'Ngò yohtung rahkyang wui tô lhê; haû lé ê wú râ dut ri. Haû mù, ngo lé ahkáng byi shi laq.' ga yhang lé taî ri.

¹⁹ Dum rayuq le, 'Ngò, nohtó ngo zúm wui tô lhê; haû pé lé dui nhang chyam wú râ dut ri; ngo lé ahkáng byi shi laq.' ga taî wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga taî wô ho ri.

²¹ Haû jáng, dui-nhâng zoshâng taû lò mù, yhâng é yhumsíng lé haû hkyô banshoq lò tâ kyô ri. Haû hkûn, yhumsíng hpó gi, nhikmó gyô yo mù, 'Wà mâ é hkyô mó hkyô zo hkat hkangmó má hân hân é mù luî, myùng bang, hkyî gyui loq hten bang eq myoqjit bang lé, ê ji lò aq.' ga luî, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhumsîng ê, nàng nhang é eq rajung za ban kut bê; nghut kôhang, zùng râ jowò gi, mân tô ashî.' ga taî ri.

²³ Haû su ga jáng, yhumsîng hpó gi, 'Ngá yhûm byíng râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq. ²⁴ Nang lé ngò taî lé, hí lé ji to huí é bang rayuq lháng, ngá é zoshuq poí lé wó chyim wú râ a nghut.' ga luí, yhâng é dui-nhâng zoshâng lé taî ri." gâ ri.

Yesuq É Chángzo Wó Dut Râ Matú

Mht 10:37-38; 5:13; Mrk 9:50

²⁵ Byù hpûng mó Yesuq eq rahá e ló kô é hkûn, Yesuq gi, haú bang lé lhing wú luí, ²⁶ "Ngá chyáng lé sù ó yuq nghut kôle, yhumsîng é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haû htoq agó, yhumsîng é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsîng é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mâ é byù rayuq yuq, tsehtung yhûm ralhum saí nau le, yhang gi, yhûm haû ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyì kó râ l hú? ²⁹ Laqmá mù, apûn awang gi, saí hi to mù luí, a wó lhoq pân é nghut jáng, ³⁰ myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô râ nghut lhê.

³¹ Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luî, hí a myit wú é nyì râ l hú? ³² A ûng râ dut le gi, gyè pé we we má nyi tô ashî hkûn lé, lagyo suwún pé lé nhang kat luî, simsaq râ matú htingrám pyám ra râ nghut lhê. ³³ Haû eq rajung za, nungmoq chyáng mâ é ó yuq nghut kôlhang, yhumsîng wó é zè banshoq lé, a pyâm to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlhang, xomân kân byuq jáng gi, haû lé hai eq dum wó lhoq ngam yù râ l hú? ³⁵ Haû gi, myigung matú le, myìhpún kut râ matú le, akyû a bò lo. Haû mù luî, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taî ri.

15

Byuq Byuq É Sau *Mht 18:12-14*

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô. ² Haû hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taî put nyi bum akô.

³ Haû mù, Yesuq yhangmoq lé dangtú dông taî é gi, ⁴ "Nungmoq má, sau rashô du wó luî radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haû lé, myàng shoq a châng ho yu é, ó yuq wá nyi kó râ

lhú? ⁵ Byuq byuq é sau haú lé myang hô jáng, gyaí gau é i-myit eq goqsân htoq má bún kê chûng mù, ⁶ yhûm má jé jáng, yhâng é buinùm ji-myi wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí râ nghut lhê. ⁷ Haú eq rajung za, Ngò, nungmoq lé taí kôlé, myit lhîng a râ é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú ralhum gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú râ a nghut lhú? ⁹ Haú lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí râ nghut lhê. ¹⁰ Haú eq rajung za, Ngò, nungmoq lé taí kôlé, myit lhîng é yubak dap sù rayuq é yanmai, Garai Gasâng é maumang lagyô pé hí má, gabú jowò dut râ nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri. ¹² Haú nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù,

mau we shut ê luî, haú jowò má, mingkan ngón hkyô châng é má yhang wó é ngunzè banshoq lé langsa pyám bê. ¹⁴ Haú su kut ngunzè wó mi-wó lé ban langsa pyám é htâng má, haú mau má mutmó gyo é yanmai, yhang gi, asho awui dut lo nyi bê nghut ri. ¹⁵ Haú mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. ¹⁶ Haú hkûn, yhang gi, waq jùm zô é shigyang cham pé lé lháng, zo naú shoq dut kôlhang, ó yuq le a byi zo kó nghut ri.

¹⁷ Haú mù, yhang myit bún lo é gi, 'Ngá wâ chyáng nyi é langchyâng pé gi, agùn agó myàng zô nyi kó râ nghut lhê. Nghut kôlhang, ngò gi, shí jowò má, zo mut wuishit é eq shi ló râ dut bê. ¹⁸ Ahkuî, ngò toq mù, ngá wâ chyáng taú ló luî, "Áwa ê, ngò gi, Garai Gasang lé le, nang lé le, shut bê. ¹⁹ Ahkuî mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq." nghû luî, ló tái râ.' gâ ri. ²⁰ Hau htâng, yhang toq luî, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luî, din é mù, yhangzô é lingzing má ê po pyik dap to luî, bopuq puq byi ri.

²¹ Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuî mai, ngò gi, nung zo nghû râ a gíng lo.' ga luî, yhâng wa lé dúng tôngbán ri.

²² Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyî má le hkyî-tsung tsung byi keq. ²³ Tsô myum

tô é nojûng zo le yu sat keq. Haû mù, nga-nhúng gi, zoshuq poí kut mù chôm ngón sháng. ²⁴ Haû mù gâ le, ngá zo shí yuq gi, shi byuq é mai, ahkuí dum ðuì bê; byuq byuq é mai le, ahkuí dum myàng bê.' ga taí ri. Haû mù, yhangmoq gi, ngón ngón zo shuq ló bekô.

²⁵ Haû u lé, yhangzo ko sù yuq kúm gi, yò má nyi tô ri. Yhang gi, yò mai yhûm shut jé lo nyi é hkûn, zìng ût bat luí gó nyi é htê lé lò wó gyô ri. ²⁶ Haû mù, langchyáng rayuq lé wut yù luí, haû hkyô lé yhang myí wú le, ²⁷ langchyáng haû gi, 'Nung gu dum taû jé lô bê. Haû mù, náng wa gi, nung gu wáng wáng zán zán dum taû jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

²⁸ Dang haû lé wó gyo jáng, yhang gi, gyô nhik-yo luí, yhúmkaû shut a wàng lo kut ri. Haû mù, yhâng wa htoq ê luí, yhang lé ê chyuaq ri. ²⁹ Yhangzo kúm gi, 'Wú aq, ngò, shî-myháng shîlo náng é jùn dông kut luí, hkâ-nhám le náng dang lé a lu laí wú. Nghut kôlhang, ngò ngá é luzúm wuî eq ngón kún râ matú, bainám zo radu lháng radàm le nàng a byi wú shi. ³⁰ Shiwa myhî pé eq zum yap wún luí, náng é sutzè lé lhoq pân pyâm é sù nung zo haû dum taû jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!' ga luí, yhâng wa lé tû taí ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê. ³² Nghut kôlhang, shî nung gu gi, shi byuq é mai ahkuí dum ðuì bê; byuq byuq é mai le, dum myàng bê. Haû

mù, gabú hpo nghut bê.' ga luí, yhang lé taí ri." gâ ri.

16

Hpaqchyî Ge Dâ É Sùt Zum Sû

¹ Yesuq, Yhâng é chángzô pé lé taí é gi, "Sahtê rayuq chyáng sùt zum sû rayuq nyi ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu l hú? Nàng sùt zúm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sû wó kut lo râ a nghut lo.' ga taí ri.

³ Haú jáng, sùt zum sû gi, 'Ahkuí, ngò hkâsu kut lo râ l hú? Ngá é yhumsing gi, ngo lé sùt zum ayá mai lhoq hkyô pyám bê. Myì du myì hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zúm é ayá mai hkyô pyám htâng má, supé ngo lé yhangmoq é yhúm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi, yhâng yhumsing hpó lé chyín dap tô é bang rayuq htâng rayuq lé wut yù mù, sâng-hî yuq lé, 'Ngá yhumsing hpô chyáng nàng chyín hkâ-myhó dap tô lhê l hú?' ga myi jáng, ⁶ haú yuq gi, 'Xû rashô pûng dap lhê.' ga tû taí ri.

Haú jáng, sùt zum sû gi, 'Nàng é jihpán yù luí, hân zùng mù, ngo xê pûng kut kâ to aq.' ga yhang lé taí ri.

⁷ Dum rayuq lé, 'Nàng hkâ-myhó dap tô lhê l hú?' ga myi jáng, haú yuq gi, 'Sungsô rashô búng dap

lhê.' ga tâ ri. Sutzum sù gi, haú yuq lé, 'Náng é jihpán má shit xê búng kut kê to aq.' ga tâ ri.

⁸ Haú a dingmán é sùt zum sù lé, yhumsîng hpó gi, hpaqchyî ge da sù nghut ri ga hkya-ôn ri. Ngò shî lé tâi é gi, mingkan zo wuî gi, yhangmoq é mingkan eq sêng é hkyô pé má, maubó gung é yhangzo pê* htoq hpaqchyî je bò kê é yanmai nghut lhê. ⁹ Haú mù luî, Ngò nungmoq lé tâi kyo kôle, a tara é sutzè pê èq buinùm ho nyî keq, haú mù, sutzè haú htûm byuq jáng, nungmoq lé, ahtum abyuq joq tô é yhûm má, lhom hap yu é hui kó râ nghut lhê.

¹⁰ Tiq é mù má wó lum é sù ó yuq nghut kôlhang, mù mó má le wó lûm râ nghut lhê. Tiq é mù má lhum a zuî é sù ó yuq nghut kôlhang, mù mó má le lhumzui râ a nghut. ¹¹ Haú mù, mingkan sutzè má lhang nungmoq lé a wó lûm kê é nghut le gi, haú tengmán é sutzè lé, nungmoq chyáng ó yuq wá kâm ap byi râ l hú? ¹² Supé é sutzè má, nungmoq lé a wó lûm kê é nghut le gi, nungmoq sîng âng é sutzè lé, nungmoq chyáng ó yuq wá kâm ap byi râ l hú?

¹³ Dui-nhâng zoshâng ó yuq nghut kôlhang, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chytidap râ nghut lhê; haú a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga tâ ri.

¹⁴ Ngùn myoqnoq é Hparishe pé gi, dang haú banshoq lé wó gyo kôjáng, Yesuq lé wuizui kut

* **16:8** Maubó gung é yhangzô pé nghu é gi, Garai Gasâng é yhangzô pé lé tâi é nghut lhê.

pyám byî akô. ¹⁵ Haû mù luî, Yesuq gi, yhangmoq lé, "Nungmoq gi, byu pê hí má yhumsing gùng lé yhumsing dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myt unghkaû lé sé sù nghut lhê. Byù é hí má hpauđap é pé gi, Garai Gasâng é hí má achauq achyut é nghut nyi ri.

¹⁶ Jep é tarâ† eq myiqhtoî pê é dang, ahko ahkáng wó tô é ahkyíng gi, wui-myhup sará Yohan jé lé é buinyì jé shoq nghut bê. Haú hkyíng mai gi, Garai Gasâng é mingdán hkyô gabú danglù lé, hko kyô nyì mù, yuq du jup gi, haú hkyô má htung chying wang ló bum akô. ¹⁷ Jep é tarâ mâ é tiq dik é dangjí eq myihkyet zo ralhúm lé wó lhoq hten râ htoq, mauhkung eq myigùng hten râ gi, je luì râ nghut lhê.

¹⁸ Dangké, yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taî ri.

Sahtê Hpó Eq Lazaruq

¹⁹ Yesuq dum xoq taî é gi, "Radàm lé, sahtê rayuq gi, nè é eq nú-nhâm é mebu wut mù luî, nyí nyí buì buì zo ngón shuq ngón nyi ri. ²⁰ Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô. ²¹ Haú yuq gi, sahtê wá é siboî mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byî nyi akô.

† **16:16** Jep é tarâ gâ é gi, Garai Gasang, Mosheq mai nga-nhúng lé byi tô é tarâ lé gâ lhê.

²² Htâng má, haû dung zo sù shi byuq jáng, mau-mang lagyô pé gi, mauhkûng má nyi é Abraham é tanghkoí má yhang lé shuí lô byí akô. Sahtê wá le shi byuq luí, yhûm pyám bekô nghut ri. ²³ Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri. ²⁴ Haû mù, yhang gi, 'Áwa Abraham ê, ngo lé shogyo yù laq ô. Ngò gi, shî myi htum má achiyí aku nyé é hui zô nyi ri. Haû mù, Lazaruq gi, yhâng é loqnyhui û èq wui má tik yû mù, ngá é shô má wui ra-poq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵ Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bún nyi aq. Ahkuí, yhang kúm gi, shî má lo nyi byán to bê; nàng chyaú gi, jamjau hui zô nyi bê. ²⁶ Haû mai gotû gi, shî mai nungmoq chyáng dap lé naû bang a wó dap shoq le, haû mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyâm to bê nghut ri.' ga tû taí ri.

²⁷ Sahtê wá gi, 'Áwa ê, haû nghut le gi, ngò, nang lé dúng nau ri. Ngá gû pé ngo yuq nyi ashî; yhangmoq le ísu hpuzô é jowò má a jé sháng gaq, ²⁸ yhangmoq myit lhíng shoq lô taí pun râ matú, Lazaruq lé ngá wâ yhûm shut nhang kat byi laq ô!' ga luí, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyô yù kó sháng gaq.' ga taí ri.

³⁰ Sahtê wá gi, 'Áwa Abraham ê, haû su a nghut. Shi byuq é bang mâ é rayuq yuq yhangmoq chyáng dum taû lo é nghut le kúm gi, yhangmoq myit lhîng kó râ nghut lhê.' ga taî ri.

³¹ Abraham gi, 'Mosheq eq myiqhtoî pê é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taî kyo kôlhang, kâm gyo kó râ a nghut.' ga luî, yhang lé tû taî ri." gâ ri.

17

Mara Hkyut É Hkyô Eq Lumjîng Myit Mht 18:6-7, 21-22; Mrk 9:42

¹ Yesuq, Yhâng chángzô pé lé taî é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlhang, mara kut shut nhang é hkyô lé lhoq htoq é sù gi, dingnyé wó râ. ² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuî hut byi luî, wuimau má ê dú hkyô pyâm é huî é nghut le gi, yhang é matú je gè râ nghut lhê. ³ Nungmoq gi, yhumsîng gûng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luî, mhoqshit aq; yhang myit lhîng é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dàm shut mù, 'Ngò myit lhîng bê.' ga luî, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dûng akô.

⁶ Haû jáng, Yhumsîng gi, "Nungmoq é lumjîng myit angshi cham í za hkâlhâng bò kô é nghut le gi, shî hangwâ gàm lé, 'Sikgâm ê, amyit eq roq bún luî, wuîshuq lung-aû má, ê yuq to aq ô.' gâ le, nungmoq é dang lé sikgâm haû gyo byi râ nghut lhê.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haû yohtung pá mai jé lo é hkûn, yhang lé, 'Hân zùng mù zang zo aq.' ga luî, ó yuq wá taí kó râ lhú? ⁸ Haû dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyî aq. Ngò bàn zo jáng sheq nàng wó zo râ nghut lhê.' ga luî, taí râ a nghut kó lhú? ⁹ Taí mitaí banshoq lé, dui-nhâng zoshâng ban zui saí byî é nghut kôlhâng, yhang lé jeju bún é dang ó yuq wá taí wú akô lhú? ¹⁰ Haû eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghû taí keq." ga taí ri.

Manggâm Dap Bang Raxê Yuq Lé, Yesuq Lhoq Gé Byî É Hkyô

¹¹ Ahkuî, Yesuq gi, Yerusalem wà mó shut e ló nyi le, Samariq mau eq Galile mau gyoro mai laî e ló ri. ¹² Yhang, wà rawà shut wang ló é hkûn, manggâm dap é byù raxê yuq eq huî ri. Haû bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luî, wut garû bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pê chyáng ló tún shit keq."

ga yhangmoq lé taî ri. Yhangmoq gi, hkyô má ru sô nyi ashî le lháng, sân-yúng lô byuq bekô.

¹⁵ Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taû ê mù, htê mó èq Garai Gasang lé hkya-ôn é eq, ¹⁶ Yesuq é hkyî wang má paî gop to luî, Yhang lé jeju hkya-ôn nyi ri. Haú yuq gi, Samariq byù nghut ri.

¹⁷ Haû mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká lô byuq bekô?" ¹⁸ Shî tungbàu rayuq mai lai luî, dum taû lé mù Garai Gasang lé hkya-ôn é byù, rayuq le a nyi lo kó lhú?" ga taî ri. ¹⁹ Hau htâng, Yesuq gi, haú yuq lé, "Toq mù lô aq, náng é lumjúng myit gi, nang lé lhoq sân-yúng byi bê nghut ri." ga taî ri.

Garai Gasâng É Mingdán Jé Lô Râ Hkyô
Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myî akô. Haû jáng, Yesuq gi, "Garai Gasâng é mingdán jé lé râ gi, myoq èq wú luî myàng râ a nghut. ²¹ Garai Gasâng é mingdán gi, nungmoq yuq jup é ahkaû má nghut nyi é yanmai, 'Wú keq, shí má joq ri, mhó má joq ri.' ga luî le, byu pé gi, wó taí kó rá a nghut." ga luî, yhangmoq lé tú taî ri.

²² Chángzô pé lé le Yesuq taî é gi, "Haû Byu Yhangzô é buinyi ra-nyí lé, nungmoq myàng nau dik é ahkyíng jé râ. Nghut kôlhang, nungmoq gi, Byu Yhangzo lé wó myâng kó rá a nghut. ²³ Haú buinyi má, byu pé gi, nungmoq lé, 'Yhang shí má nyi ri.' haû a nghut jáng, 'Yhang hê má nyi ri.' ga taí kó rá nghut lhê. Nghut kôlhang, hkâ-ê; hkácháng

kó. ²⁴ Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haû Byu Yhangzo dum jé lé é buinyi má le dut râ nghut lhê. ²⁵ Nghut kôlhang, haû su a dut htoq shimá, Yhang gi, zing-rî é myo myo lé le, ipyat shi mâ é byu pê èq he-ngik pyâm é lé le, hui shirâ nghut lhê.

²⁶ Noaq é tsîn pyat má dut é su, haû Byu Yhangzo jé lé é buinyi má le dut râ nghut lhê. ²⁷ Byu pé gi, Noaq, wuî-sanghpo mó hkaû má wang é hkûn jé shoq, zo zo shuq shuq, myi byi myi yû, myiháng kut luî, nyi nyi bum akô. Haú hkûn, dowuî dîng lô mù, yhangmoq banshoq lé lo lhoq htên pyám bê nghut ri.

²⁸ Haû eq rajung za, Lot é pyat má le, byu pé gi, zo mù, shuq mù, ung zo wuî zo, ho zo ho shuq, yhûm kut luî nyi nyi akô. ²⁹ Nghut kôlhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô luî, lhunglhang lé lhoq htên pyám bê nghut ri.

³⁰ Haû Byu Yhangzo, lé htoq shit é buinyi má le, haû eq rajung za dut râ nghut lhê. ³¹ Haú buinyi má, yhumhkûng* htoq má nyi tô é sù gi, yhúmkaû mâ é zè lé, a ló gyó wang yù lo sháng gaq. Yò má nyi tô é sù gi, haû eq rajung za, yhûm shut a taû ló lo sháng gaq. ³² Lot é yhangmyi† lé bûn nyi keq. ³³ Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê. ³⁴ Ngò, nungmoq

* **17:31** Yudaq byu pê é yhumhkûng gi, rá é nghut lhê mù, nyi kún jang kut akô. † **17:32** Lot é yhangmyi gi, Sodom wà shut dum taû lhing wú é yanmai, Garai Gasang lhoq hten pyám é hui sù nghut lhê.

lé taí kyo kôlé, haú myîn lé, yhupjang ralhum má byù í yuq nyi to kô le, rayuq gi, shuî yu é hui mù, rayuq gi, myit gyó to râ nghut lhê. ³⁵ Myiwe í yuq luí má rahá za chôm luí nyi tô le; rayuq gi, shuî yu é hui mù, rayuq gi, myit gyó pyâm to râ nghut lhê. ³⁶ Yohtung má byù í yuq nyi to le, rayuq gi, shuî yu é hui luí, rayuq gi, myit gyó pyâm to berâ nghut lhê." gâ ri.

³⁷ Haú hkûn, chángzô pé gi, "Yhumsîng Yesuq ê, haú gi, hká gyo má dut râ lhú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lhê." ga luí, yhangmoq lé tû taí ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhám le kyûdûng nyi râ hkyô lé, dangtú dông mhoqshit é gi, ² "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri. ³ Haú wâ má chuimó myhí rayuq le nyi ri. Yhang gi, haú tarâ agyi wá chyáng ê luí, 'Ngò eq amû htoq sù lé, yhâng é mara eq rajung za, jéyáng byi laq.' ga luí, ê dum taí taí kut nyi ri.

⁴ Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byí é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amû lé, ngò a jéyáng a doqdan byí é nghut le gi, yhang dum lé lé kut mù, ngo lé myit hpêbù

nhâng râ dut ri. Haû mù, ngò yhâng é amû lé jéyáng byi râ.' ga, yhâng é unghkaû má myit yu ri." gâ ri.

⁶ Haû mù luí, Yhumsing Yesuq gi, "A ding a mán é tarâ agyì wá taí é dang mai mhoq yû keq.

⁷ Garai Gasang gi, Yhang lé nyí myín wut dúng nyi é, Yhang hkyin yu to bê bang lé, tarâ é dông a kut byí é gi, myáng myáng nyi to râ lúhú? ⁸ Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haû Byu Yhangzo jé lé é buinyi má, lumjínng hkyô lé gi, mingkan htoq má myang wú shirá lúhú?" ga taí ri.

Hparishe Eq Kang Guq Sû Kyûdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi, ¹⁰ "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sû nghut ri. ¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shî kang guq sû su le, a nghut é yanmai, ngò nàng lé jeju bûn lhê ô! ¹² Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luí, yhang baú yhang gotú kut dúng nyi ri.

¹³ Kang guq sû kúm gi, we we má yap to mù, mauhkûng shut lháng a wám tu wú é za, wànggàng bat luí, 'Garai Gasang ê, shî yubak dap sû ngo lé, shogyô yù laq ò!' ga dúng ri.

¹⁴ Ngò, nungmoq lé taí kôlé, kang guq sû kúm gi, Garai Gasang é hí má mara hkyut san byí é lé wó yû luí, yhûm shut dum taû ló bê; nghut kôlhang,

Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga taí ri.

Zoshâng Wuì Lé Yesuq Shimân Byî É Hkyô

Mht 19:13-15; Mrk 10:13-16

¹⁵ Byu pé gi, zonú wuì lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haù lé myàng jáng, lhom tân hkûm akô nghut ri. ¹⁶ Nghut kôlhang, Yesuq gi, zoshâng wuì lé, wut yù luì, "Haù zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haù sù é bâng é mingdán ru nghut lhê. ¹⁷ Ngò, nungmoq lé teng za taí kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haù má gè gè yhang wó wâng râ a nghut." ga taí ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ahtum abyuq é asak wó yù râ matú, ngò haí kut ra râ lhú?" ga myí ri.

¹⁹ Yesuq gi, "Haí mù, Ngo lé ge é Sará nghu lhê lhú? Garai Gasang mai lai luì, ge é ó yuq le a nyì. ²⁰ Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.'[☆] gâ é dang pé lé, nàng sé gû bê." ga luì, yhang lé tû taí ri.

[☆] **18:20** Htoq Ló 20:12-16

21 Haú yuq gi, "Haú pé banshoq lé, ngò, zoshâng hkûn mai châng bê nghut lhê." ga taí ri.

22 Yesuq gi, dang haú lé wó gyo jáng, "Nàng kut râ rajung râ tô ashî; nàng wó miwó lé ûng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé châng aq." ga luí, yhang lé taí ri.

23 Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. 24 Yesuq gi, haú yuq lé wú luí, "Sutzè wó bang gi, Garai Gasâng é mingdán má wàng râ matú, haú-í yhang wuî ri-nhung! 25 Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luí râ nghut lhê." ga taí ri.

26 Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lhú?" ga myî bum akô nghut ri.

27 Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

28 Haú hkûn, Petruq gi, Yesuq lé, "Wú aq, ng-amoq gi, wó miwó tô pyâm to luí, Náng htâng châng bê nghut lhê." ga taí jáng,

29 Yesuq gi, "Ngò, nungmoq lé teng za taí kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôle, 30 shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luí, yhangmoq lé taí ri.

*Yesuq, Yhang Shî Hkám Râ Lé Dum Taî É Hkyô
Mht 20:29-34; Mrk 10:46-52*

³¹ Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, nga-nhúng gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luî, myiqhtoí pé kê tô é banshoq gi, dik lò berâ nghut lhê. ³² Hkâsu mù gâ le, Byu Yhangzo gi, tûngbaù pé é loq má ap pyâm é hui luî, haú bâng eq Yhang lé, wuìzui kut pyâm é, rhoi rip e, sôkan byé gyûn é, nhuq bat é kut yû mù, sat pyâm kó râ nghut lhê. ³³ Hau htâng sum nyí nghû râ buinyì má, Yhang gi, dum dui toq lô râ nghut lhê." ga luî, yhangmoq lé taî ri.

³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haî taí nyi é hkyô pé lé yhangmoq a sé kó nghut ri.

*Dung Zo É Myoqjit Sû Lé, Yesuq, Myoq Dum
Myàng Nhang É Hkyô*

³⁵ Ahkuî, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajùm rayò sô laî ló é htê lé wó gyo jáng, haú haî dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq laî ló ri." ga luî, yhang lé taî kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má laî ló é bang gi, zim za nyi râ matú yhang lé tân hkûm akô; nghut kôlhang, yhang gi,

"Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dũng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi, ⁴¹ "Ngò, nàng lé haì kut byi râ ô nau ri l hú?" ga, yhang lé myi kat ri.

Haú yuq gi, "Yhumsing ê, ngò myoq myàng nau ri." ga tũ taì ri.

⁴² Hau hkũn, Yesuq gi, "Náng myoq myàng sháng gaq! Náng é lumjìng myit gi, nang lé lhoq gê byi bê nghut ri." ga, yhang lé taì ri. ⁴³ Haú yuq gi, haú hkũn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yeriho wà má wàng mù, sô lai ló nyi ri. ² Haú hkũn, haú wà má, Zake gâ é kang guq agyì rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng nàu kôlhang, nyhùm sù nghut é htoq agó, byù rajùm rayò chýn chyap tô é yanmai, a wó myâng nghut ri. ⁴ Haú mù, yhang gi, Yesuq lé wó myâng shoq ga, Yesuq lai ló râ hkyô hí shut òn ê mù, hkohùm gãm htoq má ê doq zung tô ri.

⁵ Yesuq gi, haú jowò má jé jáng, tu wú kat lui, "Zake ê, hân gyó lô aq; hkũ-nyí ngò náng yhùm má bíng râ nghut lhê." ga taì ri. ⁶ Haú jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

⁷ Haû má nyi bang banshoq gi, haû lé myàng jáng, "Yhang gi, yubak dap sù rayuq chyáng bing kut râ ga wang e ló bê." ga luí, mara hûn dang tái nyi bum akô.

⁸ Zake kúm gi, toq yap mù, "Yhumsing Yesuq ê, ngò wó é sutzè rawuí gû myùng bang lé gàm byi pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsing Yesuq lé tái ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhûm má hkyi yù hkyô jé bê, ¹⁰ hkâsu mù gâ le, haû Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luí, Zake lé tái ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhum đông dum tái jat é gi, ¹² "Aróng wó sù byù rayuq gi, hkokhâm ayá é hkam yù luí, dum taû lò râ ga, wê é ming shut ê râ matú hen nyi ri. ¹³ Haû mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taû jé lô shoq, shi eq hpugá gá nyí lánq keq.' ga luí, yhangmoq lé pying tô ri.

¹⁴ Yhâng é mingbyû wui kúm gi, yhang lé a ngui bum é nghut mù luí, yhang e ló é htâng má, 'Shí yuq

* **19:9** Abraham é yhangzo nghû é lichyúm gi, Abraham su Garai Gasang lé lumjing é sù lé gâ lhê.

ngamoq ahtoq má up nyì râ lé, ngamoq a ô naù.' ga luî, ê taí râ matú lagyo châng nhang kat akô.

¹⁵ Nghut kôlhang, yhang kúm gi, hkohkâm ayá wó hkam yù luî, dum taû jé lô jáng, yhang ngùn ap byî tô é dui-nhâng zoshâng wuì lé, hpugá gá luî, amyat hkâ-myhó wó ho jat bê hkyô lé sé naù luî, yhangmoq lé wut nhang kat ri.

¹⁶ Haú hkûn, sâng-hî yuq gi, lé mù luî, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luî, yhang lé taí ri.

¹⁸ Htang yuq le, lé mù luî, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gá ri.

¹⁹ Yhumsîng gi, haú yuq lé, 'Nàng gi, wà ngo wá lé up lo aq hkoi.' ga taí ri.

²⁰ Dum rayuq le, lé mù luî, 'Yhumsîng ê, náng é ngùn rajoí lé a byuq shoq, ngò panchoq eq htup tô lhê; wú aq, shî nghut lhê. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhîng, ²³ ngá ngûn lé, ngò dum taû jé lô jáng, aráng

eq amyat wó yû shoq, ngùn hpún kat jang má, haî mù a kat tô é l hú?' ga yhang lé taî ri.

²⁴ Hau htâng, yhumsîng hpó gi, ayàm má yap tô é bang lé, 'Haû ngùn rajoî lé yhâng chyáng mai taû yû luî, raxê joî wó sù lé jat byi keq.' ga taî ri.

²⁵ Haû bang gi, 'Yhumsîng ê, yhang gi, raxê joî wó to bê lé nhîng.' ga akô.

²⁶ Haû jáng, yhang gi, 'Ngò, nungmoq lé taî kôlé, wó sù† ó yuq le, jat byî é hui shirâ nghut lhê; a wó su chyáng mai kúm gi, yhang wó tô é lé l háng, yu pyám byi shirâ nghut lhê. ²⁷ Ahkuî, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taî jáng, hí má so luî, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé, ³⁰ "Nungnhik, hí mâ é wà má ê keq; wà haû má wang é hkûn jáng, ó le a jî wú shî é logúng zo tuî tô lánng é lé, ê myâng kó râ nghut lhê; haû lé hpyi yù mù, Ngá chyáng she lò keq. ³¹ Byù rayuq yuq mai, 'Haû haî mù hpyi nyi akô?' ga nungnhik lé myi kôjáng, 'Shí du lé, haû Yhumsîng râ ri gâ.' nghû tû taî keq." ga pyîng luî, nhang kat ri.

³² Nhang kat é sù nhik ê jé lé, Yesuq taî kat é dông yhang, dut to lánng é lé ê myang akô. ³³ Yhangnhik

† **19:26** Wó sù ngu é gi, yhumsing a-tsam lé rago dat chûng sù lé taî é nghut lhê.

logúng zo haú lé hpyi nyi kô é hkûn, yhumsîng wui gi, "Haú logúng zo lé, haî mù hpyi nyi akô lhu?" ga luî, yhangnhik lé myî akô.

³⁴ Haú jáng, yhangnhik gi, "Shí du lé haú Yhumsîng râ ri gâ." ga taî akô.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buî luî, Yesuq lé doq ji nhang akô. ³⁶ Haú su kut, Yhang ji e ló nyi le, byu pé gi, yhangmoq é buhîng pé lé hkyô má hkang byî akô.

³⁷ Ahkuî, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pê é yanmai, gabú myit mai htê mó o mó eq Garai Gasang lé hkya-on kô é dang gi,

³⁸ "Haú Yhumsîng é myîng mai jé lé lo é hkohkâm gi, hkungsô wó nyî sháng gaq ô!✧ Mauhkûng htoq má, nguîngón nyî sháng gaq ô!

Htoq tsáng myhâng má, Garai Gasang gi, hpung-wup shîngkang bo nyi sháng gaq ô!" gâ akô.

³⁹ Haú mù luî, haú byù hpûng hkaú má bo é Hparishe pé ra-am gi, "Sarâ ê, nâng é chángzô pé lé tân pyám aq." ga luî, Yesuq lé taî akô.

⁴⁰ Haú hkûn, Yesuq gi, "Ngò, nungmoq lé taî kôlé, shí bang zim za nyi kó é nghut le gi, luqgok pé garú lô râ nghut lhê." ga tû taî ri.

⁴¹ Ahkuî, Yesuq, Yerusalem wà mó eq chyâng lò luî, wà mó haú lé myàng jáng, haú wà mó é matú ngaù mù, taî é gi, ⁴² "Wà nâng ê! Hkû-nyî lhê é buînyî má, nguîngón é hkyô lé nâng bûn sé tô é

✧ 19:38 Hkya-on 118:26

nghut le gi, gè râ wá! Ahkuî kúm gi, haú hkyô lé nghop to bê nghut mù luí, nàng a sé lo nghut ri. ⁴³ Hkâsu mù gà le, náng chyáng Garai Gasang lé kúm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buinyì jé lô râ nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaû má yhang dún nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gà ri.

*Yesuq, Noqkuq Yhûm Lé Sêng Pyâm É Hkyô
Mht 21:12-17; Mrk 11:15-19; Yhn 2:13-22*

⁴⁵ Ahkuî, Yesuq gi, Yerusalem noqkuq yhûm má wàng mù, ung zo ung shuq é bang lé, "'Ngá yhûm gi, kyûdung yhûm dut râ nghut lhê.'[☆] ga kâ to kôlhang, ⁴⁶ nungmoq gi, jowò shî lé 'damaq hkyûng'[☆] kut akô." ga taí uchyang, hkat htoq pyâm ri.

⁴⁷ Yhang gi, nyí wuí noqkuq yhûm má mhoqshit nyi ri. Hkyangjong agyì pé, tarâ sará pé eq, byu pé é suwún wuí kúm gi, Yhang lé wó sat pyám râ hkyô ho nyi akô. ⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

20

*Yesuq É Ahko Ahkáng Lé Myî Chyam Wú É Hkyô
Mht 21:23-27; Mrk 11:27-33*

¹ Ra-nyí lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko

☆ 19:45 Esai 56:7 ☆ 19:46 Yer 7:11

kyô nyi é hkûn, hkyangjong agyi pé gi, tarâ sará pé, suwún wuí eq rahá kut, Yhâng chyáng lé jé kômù, ² "Hai ahko ahkâng èq Nàng shí pé lé kut nyi lhé lhú? Ahko ahkâng shî, Nang lé ó yuq byî é lhú? Ngamoq lé taî kyô wú aq." ga Yhang lé myî akô.

³ Haú hkûn, Yhang gi, "Ngò le, nungmoq lé rajung myî wú kôlé; ⁴ Yohan byî é bapisma gi, mauhkûng mai lhú? A nghut jáng, byu chyáng mai lhú? Ngo lé taî kyô wú keq?" ga yhangmoq lé myî ri.

⁵ Haú hkûn, yhangmoq chôm hpyê lhum kô é gi, "'Mauhkûng mai nghut lhé.', nghû nga-nhúng taî jáng le, 'Haí mù, yhang lé a lumjîng kô é lhú?' ga râ nghut; ⁶ 'Byu chyáng mai nghut lhé.' nghû jáng le, shiwa byù banshoq gi, Yohan lé, myiqhtoi rayuq ga lumjîng to kô é yanmai, yhangmoq, nga-nhúng lé luqgok èq dú sat kó râ nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tû taî akô.

⁸ Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taî kyo." ga, yhangmoq lé taî ri.

Tsibiyiq Hkyâm Yhumsîng Eq Hkyâm Saí Zo Bang Mht 21:3-46; Mrk 12:1-12

⁹ Byu pé lé, Yesuq dangtú dông xoq taî kyô é gi, "Byù rayuq gi, tsibiyiq hkyâm ralhum saí to mù, hkyâm saí zo bâng chyáng ngho byî to luî, gó ming shut myáng myáng ê nyi byuq ri. ¹⁰ Kyôshu yoq jé jáng, yhang gi, hkyâm saí zo bâng èq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôhang, hkyâm saí zo bang gi, haú

yuq lé lhom bat mù, loq kôm taû nhang kat akô.
 11 Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhâng, yhangmoq gi, haú yuq lé le, lhom bat mù, hoq lhoq hpu luî, loq kôm dum taû nhang kat akô. 12 Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luî, hkyâm mai hkat htoq kat akô.

13 Haú hkûn, tsibiyiq hkyâm yhumsîng gi, 'Ngò hkâsu kut wú râ l hú? Ngò chytidap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taî ri.

14 Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yû shoq, yhang lé sat pyám sháng.' ga rayuq eq rayuq taî l húm bum akô. 15 Haú mù, yhang lé hkyâm shínggan shut dú htoq kômù, sat pyám akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ l hú? 16 Yhang gi, ê mù, haú hkyâm saí zo bang lé sat pyám luî, hkyâm haú lé góbang lé htot ngho byí pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

17 Hau htâng, Yesuq gi, yhangmoq lé byu wú luî, "Haú jáng gi,

'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.'[☆]

ga Chyúmdang má kê tô é gi, haí gá nau é nghut lhê l hú? 18 Luqgok* haú má gyó záng é sù ó yuq nghut

☆ 20:17 Hkya-on 118:22 * 20:18 Luqgok nghu é gi, Yesuq lé taî ri.

kôle, gyuî gyop byuq râ nghut lê. Luqgok hau éq gyó nhê zâng é sù le, nhê pyeq pyâm é hui râ nghut lê." ga tâ ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí tâi é hkyô lé, sé kô é yanmai, haú hkûn jáng lhang Yhang lé chyup yû râ matú hkyô ho nyi akô. Nghut kôlhang, byu pé lé byuq mù a chyup shi kó nghut ri.

*Kang Kat É Hkyô Eq Séng Luí Myi É Dang
Mht 22:15-22; Mrk 12:13-17*

²⁰ Haú mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzau chyáng Yhang lé wó ap pyâm râ matú nghut ri. ²¹ Haú jowú bang gi, "Sarâ è, nàng gi, dítg dítg mán mán tâi mhoqshit é eq, byu é myoqdong lé a tê byi é za, Garai Gasâng é hkyô lé, tengmán é dông mhoqshit é sù nghut é lé, ngamoq sê lê. ²² Hkoséng Kehta q lé, ngamoq kang kat râ gi, tarâ wang lê lhu? A wang é lhu?" ga luí, Yhang lé myi wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tân shit wú keq. Ó yuq é alhô eq masat laiká dap tô ri lhu?" ga myi jáng, ²⁵ yhangmoq gi, "Kehta q é nghut ri." ga akô.

Haú hkûn, Yesuq gi, "Haú nghut jang, Kehta q é lé gi, Kehta q lé byi keq; Garai Gasâng é lé gi, Garai Gasang lé byi keq." ga yhangmoq lé tâi ri.

²⁶ Yhangmoq gi, byu pè hí má, Yhâng é dang má mara a wó ho myang é eq, Yhang tû tâi é dang é yanmai, maú hong byuq kôluí, zim byuq akô.

*Dum Dui Toq Lô Râ Hkyô Eq Séng Luí Myî É Dang
Mht 22:23-33; Mrk 12:18-27*

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri. ²⁹ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Lô htáng má, myiwe myhí haú le châng shi ló byuq bê nghut ri. ³³ Haú mù luí, haú dum dui toq é buinyi má, myiwe myhí haú gi, haú nhiktâng wuì má é hká yuq é yhangmyi nghut râ l hú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myî wú akô.

³⁴ Haú hkûn, Yesuq gi, "Shî mingkan htoq má é byu pé gi, ikun kut é eq myi byi myi yù kut nyi bum akô. ³⁵ Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yù hkyô joq lo râ a nghut. ³⁶ Haú bang gi, maumang lagyô pé su dut byuq luí, a dat shí lo kê râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng

† **20:36** Dum dui toq lô su é yhangzô pé gâ é gi, Yesuq lé lumjíng luí, shi é htâng má dum dui toq lo é bang lé gâ lhê.

é yhangzô pé nghut bekô. ³⁷ Haû nyé duq nyi é mhanpúng eq séng luî, Mosheq èq kê tô é má lhang, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê. [†] ga bo tô é yanmai, shi é bang dum dui toq lô râ hkyô lé tûn shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhang bang gi, Garai Gasang é hí má dui nyi é bang chyat nghut akô." ga yhangmoq lé tû taî ri.

³⁹ Haû hkûn, tarâ sará pé ra-am gi, "Sarâ ê, nàng taî é jô ri." ga akô. ⁴⁰ Haû mù, yhangmoq gi, Yhang lé haî le a wám myî jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taî akô lhú? ⁴²⁻⁴³ Dawiq yhang yhang lhang gi, Hkya-on Kungtôn Laiká má, 'Haû Yhumsîng Garai gi, ngá é Yhumsîng lé, "Ngò, náng é gyè pé lé, náng é hkyî nang tanghkuq kut pyám byî é hkyíng jé shoq, Ngá é loqyo hkyam[†] shut zung nyi shi aq." gâ ri. [†] ga kê tô ri. ⁴⁴ Haû mù, Dawiq yhang lhang, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lhú?" ga taî ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

☆ **20:37** Htoq Ló 3:6 † **20:42-43** Loqyo hkyam nghu é gi, ahko ahkáng wó é jowò nghut lhê. ☆ **20:42-43** Hkya-on 110:1

⁴⁵ Byù banshoq gyô nyi é u lé, Yesuq, Yhâng é chángzô pé lé taí é gi, ⁴⁶ "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gài pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poî pé mâ é je réng é zùng jowò pé má myang zùng râ lé le, ô nau nyi bum akô. ⁴⁷ Yhangmoq gi, chuimó pê é yhûm-yò pé lé hpyoq zo hpyoq shuq kôluí, kyû hîng hîng dûng shit mhaû é bang nghut akô. Haû sù é bang gi, je riyhang htan é dông dam byî é hui zo kó râ nghut lhê." gâ ri.

21

Chuimó Myhí Kat É Alu

Mrk 12:41-44

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³ Haû mù, Yhang gi, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haû góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglhang lé kat bê nghut ri." ga taí ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham

lhang a kê lhum loshoq, hpyoq hpyi pyâm é buinyi jé râ nghut lhê." ga taî ri.

⁷ Haû su ga jáng, yhangmoq gi, "Sarâ ê, haû nghut le gi, haú hkyô pé gi, hkâ-nhám dut lô râ lú? Haû dut râ chyâng lò jáng, hkasû é kumlhá htoq lô râ nghut lhê lú?" ga, Yhang lé myî akô.

⁸ Haú hkûn, Yhang gi, "Nungmoq gi, hkyô shuí ngoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé láng é byù myo myo pô htoq lô kó râ nghut lhê. Nghut kôlhang, nungmoq gi, yhangmoq htâng hkâcháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò râ nghut lhê. Nghut kôlhang, ló htâng é buinyi gi, haú hkûn jáng dut râ a nghut shi." ga taî ri.

¹⁰ Hau htâng, Yhang, yhangmoq lé dum taî é gi, "Ra-myû eq ra-myû, mingdán ralhú eq ralhú majan zân lhúm lò kó râ nghut lhê. ¹¹ Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lô râ nghut lhê.

¹² Nghut kôlhang, haú hkyô banshoq a dut shimá, Ngá myíng é yanmai, byu pé gi, nungmoq lé chyup yû luî, zing-rí yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pê chyáng é ap byî é le, hui kó râ nghut lhê. ¹³ Haû su é pé mai, nungmoq gi, ngò eq séng luî, saksé wó hkám râ hkyô htoq lô berâ nghut lhê. ¹⁴ Nghut kôlhang, hkâsu nghû lhom tû taî râ hkyô lé, hí mai a myit wuî nyi râ lé, nungmoq

myit hpyit to keq. ¹⁵ Hkâsu mù gâ le, nungmoq é gye pé lhunglhâng bang, haî le a wó lhom tù taí loshoq, ngò, nungmoq lé dang eq hpaqchyî byi râ nghut lhê. ¹⁶ Nghut kôlhâng, nungmoq gi, înu îwâ pé, âgu âmâng pé, mungmoq eq buinùm ji-myi wui èq lhâng, ap pyâm é hui kó râ nghut lhê. Yhangmoq gi, nungmoq chyâng mâ é ra-am lé lhâng, sat pyám kó râ nghut lhê. ¹⁷ Byù lhunglhâng bang gi, Ngá é yanmai, nungmoq lé a nguì kut kó râ nghut lhê. ¹⁸ Nghut kôlhâng, nungmoq é xâm rahkat lhâng wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem wà mó lé gye hpúng mó èq lóm tô é lé, nungmoq myàng jáng, wà mó haû htên byuq râ ahkyíng chyâng lò bê lé, bûn sê nyi keq. ²¹ Haû hkûn lé, Yuda mau má nyi é bang gi, bùm pé shut hfang doq ló kó sháng gaq; haû wà hkaû má nyi é bang le, hfang htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²² Hkâsu mù gâ le, Chyúmdang má kâ to má kâ to banshoq dik lò râ matú, buinyi haû pé gi, mara dam byî é buinyi pé dut râ nghut lhê. ²³ Haû buinyi pé má, zogûng dut é myiwe wui eq naú huq ashî nghut é înu wui gi, gyai yhang wuîhke kô râ nghut lhê; hkâsu mù gâ le, shí ming ahtoq má wuîhke mó eq, shí amyû ahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, sâm lhâm èq sat pyám hui lhê eq, ming hkanng ming mó má chyup shuí ló é le hui kó râ nghut lhê. Tûngbaù pé lé byî tô é buinyi ahkyíng htáng shoq, Yerusalem wà mó gi, tûngbaù pé èq nâng zik tô é hui râ nghut lhê.

* **21:18** Shí má gi, asak woi-nyí a shí râ hkyô lé taí é nghut lhê.

²⁵ Haú hkûn, buì, kyî, lhamó pé má, kumlhá htoq shit râ nghut lhê. Wuishuq lung-aû mâ é wuilhêng pé é mying é htê mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq lô bûm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é huì bùm kô râ nghut lhê. ²⁷ Haú hkûn, haù Byu Yhangzo gi, mhut ji mù, hpungwup a-tsam mó eq le, hpungwup shingkang mó eq le, gyó lé lo é lé, yhangmoq byu-myàng kó râ nghut lhê. ²⁸ Haú hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyì gi, chyàng lò bê nghut ri." gâ ri.

²⁹ Yhang, yhangmoq lé dangtú dông xoq taí é gi, "Maihpáng gâm eq siggâm banshoq lé wú wú keq. ³⁰ Sikbu nyún lo é lé myàng jáng, buì nyé nám chyàng lò bê ga luì, nungmoq yhang dat wú sé akô. ³¹ Haù eq rajung za, haù hkyô pé dut nyi é lé, nungmoq myàng kôjáng, Garai Gasâng é mingdán gi, chyàng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat mâ é byu pé a ban shi byuq shimá, haù hkyô pé banshoq dut byuq râ nghut lhê. ³³ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyî râ nghut lhê.

³⁴ "Nghut kôlhang, zo myo shuq myô é, î shuq wut é, mingkan htoq mâ é myit wui myit hkê é pé èq, nungmoq é i-myit wò laí nyì luì, haù ngò jé lé é buinyì gi, lhaí bik lo é su, nungmoq ahtoq

má byodàn tung a jé lò sháng gaq, sidiq nyi keq. ³⁵ Hkâsu mù gâ le, buinyi haû gi, mingkan htoq má nyi é byù banshoq bâng é ahtoq má, haû su jé lô râ nghut lê. ³⁶ Haû mù luî, haû dut lò râ hkyô banshoq mai, nungmoq wó lut lai mù, haû Byu Yhangzô é hí má, wó yap gîng é bang dut sháng gaq, hkâ-nhám le kyûdung luî, ahkyíng hkangmó má machya nyi keq." gâ ri.

³⁷ Yesuq gi, nyí wuî noqkuq yhûm má mhoqshit nyi luî, myîn wuî Tsanlun Bùm gâ é bùm shut htoq é mù, ê nyi to to kut ri. ³⁸ Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Êq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-

53

¹ Ahkuî, Lhoqlhai Poî gâ é Azuma (múnchi a kat é Muk Zo Poî) jé râ chyâng lò bê. ² Haû mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wuî lé gyuq bùm kô é yanmai nghut ri. ³ Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luî, ⁴ yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, ê hpyê ri. ⁵ Haû mù, yhangmoq gi, gyô nguì luî, Yudaq lé ngùn byi râ hkyô myit hui bekô. ⁶ Yudaq le hap yù luî, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poî Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuî, haû Lhoqlhai Poî mâ é sauzo shigu hkungga sat nhông byi râ é Azuma buinyì jé bê.

⁸ Haú hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poî ê món láng keq." ga luî, nhang kat ri.

⁹ Haú nhik gi, "Hkâmá ê món to nhâng nau ri lhú?" ga luî, Yhang lé myî akô.

¹⁰ Haú hkûn, Yesuq gi, "Nungnhik, myuq hkaû shut wang e ló le wuì yambú waq é byù rayuq lhom hui râ nghut lhê; haú yuq chyáng châng ló luî, yhang wang ló é yhûm má châng wàng mù,

¹¹ yhumsing lé, 'Ngò Ngá é chángzô pé eq rahá, Lhoqlhai Poî zo râ bíng wap hkâmá nghut lhê lhú ga, Sará myí nhang kat ri.' ngû taí keq. ¹² Haú hkûn, hen tô é ahtoq mâ é wap mó lé, nungnhik lé lhom tân shit râ nghut lhê; wap haú má é món to keq." ga taí kat ri.

¹³ Haú chángzo nhik htoq e ló le, Yesuq taí kat é eq roq za é myâng kômù, Lhoqlhai Poî lé món to bekô nghut ri.

Yhumsing É Myinzang

¹⁴ Ahkuî, ahkyíng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poî shî lé nungmoq eq rahá zo râ lé, Ngò gyai ô nau nyi lhê. ¹⁶ Hkâsu mù gâ le, ngò, nungmoq lé taí kôlé, Garai Gasâng é mingdán má poî shî a ló dik dik gi, ngò haú lé dum zo râ a nghut ló." ga luî, yhangmoq lé taí ri.

17 Hau htâng, Yesuq gi, góm lé yù mù jeju ban hkya-on jáng, "Góm shî lé yù luî, nungmoq yhangchang gàm shuq lhum keq. 18 Ngò, nungmoq lé taí kôlé, ahkuî mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo." ga taî ri.

19 Hau htâng, Yhang gi, muk lé yù mù, jeju hkya-on luî, muk lé myhik hpé mù, yhangmoq lé byi uchyang, "Shî gi, nungmoq é matú byi pyâm é, Ngá é gungdu nghut lhê; Ngo lé bûn nyi râ matú, shî su kut nyi keq." ga taî ri.

20 Haû eq rajung za, myinzang ban zo jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê. 21 Nghut kôlhang, wú keq, Ngo lé ap pyám râ sù gi, zang bó shî má ngò eq rahá nyi tô ri. 22 Haû Byu Yhangzo gi, hkyin to huî é eq rajung za shî râ nghut lhê; nghut kôlhang, Yhang lé ap pyâm é sù gi, dingnyé wó ri." ga taî ri. 23 Haû su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhú ga, rayuq eq rayuq myî lhum bum akô.

24 Haû htoq agó, yhangmoq mâ é hká yuq sheq je kô lhê lhú ga le, rayuq eq rayuq taî htíng lhúm bum akô. 25 Haû mù luî, Yesuq gi, "Túngbaù pé é hkohkam pé gi, yhangmoq byù myû pé é ahtoq má up zô nyi kô é nghut luî, byu pé gi, ahkáng ayá wó é bang lé jeju yhumsing pé ga luî, taî hkungga nyi bum akô. 26 Nungmoq kúm gi, haû su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. 27 Hká yuq sheq je kô lhê lhú? Zô zung nyi sù lhú?"

Haû a nghut jáng, saí tsô é sù l hú? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. ²⁹ Haû su mù, Ngá wa gi, Ngo lé, mingdán ap byî é su, Ngò le, nungmoq lé mingdán ap byi râ nghut lhê. ³⁰ Haû mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungso cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlhang, náng é lumjǐng myit a hten sháng gaq nghû, Ngò, náng é matú kyûdung byi bê; náng dum lhing bún lò jáng, nung gu nung mâng pé lé wum-o lhoq ging byi aq." ga taí ri.

³³ Haú hkûn, Simun gi, "Yhumsǐng ê, htóng wǎng kôlhang, shí kôlhang, ngò gi, nǎng eq rahá chǎng râ matú myit hpyit to bê." ga tû taí ri.

³⁴ Yesuq gi, "Petruq ê, nang lé Ngò taí lé, hkû-nyí* lháng woq a tûn shi má, nǎng, Ngo lé a sé ga luí sum dǎm he-ngik pyám râ nghut lhê." ga taí ri.

³⁵ Hau htǎng, Yesuq, yhangmoq lé taí é gi, "Ngò, nungmoq lé ngunhtǎng, jǐhtǎng, hkyî-tsung a wùn a chǔng nhang é za, nhang kat é nghut hkûn,

* **22:34** Yudaq byu pê é ra-nyí gi, myinhtǎng búi wang é mai, htang nyí búi wang é jé shoq nghut lhê. Shí má é hkû-nyí gi, nga-nhúng é matú myín ǎng ri.

nungmoq chyáng haî ra akô lúhú?" ga myi jáng, yhangmoq gi, "Haî le a ra lo." ga taî akô.

³⁶ Haú hkûn, Yhang gi, "Ahkuî kúm gi, ngun-htûng wó sù gi, yù wun sháng gaq, jìhtûng wó sù le, yù wùn sháng gaq, shâm a wó sù gi, bumó ung luî wuì sháng gaq. ³⁷ Hkâsu mù gâ le, Ngò, nungmoq lé taî kôlé, Ngò eq séng luî Chyúmdang má kâ tô é gi, dut lò berâ nghut lhê; 'Haú yuq gi, yubak mara wó bang má nghap lhôm to bê.' ✧ ga kâ tô é dang gi, Ngá chyáng dik lò râ nghut lhê." ga luî, yhangmoq lé taî ri.

³⁸ Haú mù, lagyô pé gi, "Yhumsîng ê, wú aq, shí má shâm í hkyam joq tô ri." ga taî kôjáng, Yesuq gi, "Gé bê." ga luî, yhangmoq lé taî ri.

Tsanlun Bùm Má Yesuq Kyûdûng É Hkyô
Mht 26:36-46; Mrk 14:32-42

³⁹ Ahkuî, Yesuq gi, htoq luî, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. ⁴⁰ Haú jowò má jé jáng, Yhang gi, "Nungmoq, gunglaú é a hui sháng gaq, kyûdûng nyi keq." ga luî, yhangmoq lé taî to mù, ⁴¹ chángzô pé nyi é mai luqgok radú we kô gâng e ló luî, hkyihput htuq mù, ⁴² "Áwa ê, Náng ô nau é nghut le gi, góm† shî lé Ngá chyáng mai lhaî pyám byi laq. Nghut kôlhang, Ngò ô nau é dông a nghut, Nàng ô é dông sheq nghut sháng gaq." ga kyûdûng ri. ⁴³ Haú hkûn, mauhkûng mai maumang lagyô rayuq htoq lé luî, Yhang lé i-myt nhik lé taî tîng ri. ⁴⁴ I-myt hkaú má dik shoq hkâm

✧ **22:37** Esai 53:12 † **22:42** góm gâ é gi, Yesuq jamjau hui râ hkyô eq shî râ hkyô lé, taî nau é nghut lhê.

zo wuî é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haû mù, kyû ban dung jáng, Yhang toq luî, chángzô pê chyáng ló wú le, yhangmoq gi, myit yón mù luî, yhup myhî to kô é lé ló myâng mù, ⁴⁶ "Haî mù yhup nyi akô lhú? Toq keq! Gunglaú é a hui sháng gaq, kyûdung nyi keq." ga luî, yhangmoq lé taî ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haû su ga, ru taî nyi ashî le, wú keq, haû chángzo raxe í yuq má bo é Yudaq gi, hkyô hí mù byù rajùm rayò lé shuî lé lô luî, yhang gi, Yesuq lé bopuq puq râ ga huî lé lo ri. ⁴⁸ Haû mù luî, Yesuq gi, "Yudaq ê, nàng gi, haû Byu Yhangzo lé bopuq puq é èq gyè pê chyáng ap pyâm lhê lhú?" ga luî, yhang lé lhom myî ri.

⁴⁹ Haú hkûn, Yesuq htâng cháng bang gi, haî dut lò râ lé bún sé kô é yanmai, "Yhumsîng ê, ngamoq gi, sham èq zân le, gè râ lhú?" ga myî akô.

⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luî, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tû taî mù, haú yuq é nohkyap lé ê záng luî lhoq gê byî ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luî, lé lo akô lhú? ⁵³ Ngò gi, nyí wuî, noqkuq yhûm má

nungmoq eq rahá nyi kôlhang, nungmoq Ngo lé chyup yû râ ga a hen wú kó; ahkuî gi, mauchut èq up† nyi bê yanmai, nungmoq é ahkyíng nghut nyi ri." ga taí ri.

Yesuq Lé, Petruq Èq He-ngik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yû mù she ló luî, hkyangjong mó é yhûm shut shuí wang ló akô. Petruq le we we mai châng tô ri.

⁵⁵ Ahkuî, yhangmoq gi, wàng hkaû má myi mut yû luî zung tô bum é hkûn, Petruq le yhangmoq é ahkaû má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luî, "Shí yuq le Yesuq eq rahá nyi sù nghut ri." ga taí ri.

⁵⁷ Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htâng hkâ-myháng a myáng má, byù rayuq gi, yhang lé dum myàng luî, "Nàng le yhangmoq chyáng bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tû taí ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

⁶⁰ Petruq gi, "Byù hpó ê, nàng taí nyi é hkyô lé, ngò a sé." ga tû taí ri. Haú su ga ru taí nyi ashí le, woq tân bê nghut ri. ⁶¹ Haú hkûn, Yesuq gi, lêng luî, Petruq lé wú kat ri. Haú mù, Petruq gi,

† 22:53 Mauchut èq up gâ é gi, Tsadán èq up é lé gâ ri.

"Hkû-nyí lháng, woq a tân shi má, nàng Ngo lé sum dâm he pyám râ nghut lhê." ga luí, Yhumsing yhang lé taí é dang lé bún kat ri. ⁶² Haû mù, yhang gi, shinggan shut htoq ê luí, gyai yhang ê ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luí nghap myíng nghap htê mu nyi akô. ⁶⁴ Yhangmoq gi, Yhâng é myoqdong nghop pyám byi luí, "Nang lé bat sú gi, ó yuq nghut ri lúhú? Myiqhtoi htoí wú aq." ga myí akô. ⁶⁵ Yhangmoq gi, Yhang lé nyhap é dang ajung jung dông taí rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí é mù, ⁶⁷ "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghû taí kôlhang, nungmoq jing kó râ a nghut. ⁶⁸ Ngò, nungmoq lé myi kôlhang, nungmoq gi, tû taí kó râ a nghut. ⁶⁹ Nghut kôlhang, ahkuí mai haû Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luí, yhangmoq lé taí ri.

⁷⁰ Haû hkûn, yhangmoq banshoq bang gi, "Haû nghut le gi, Nàng, Garai Gasâng é Yhangzo nghut lhê lúhú?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tû taí ri.

⁷¹ Haú hkûn, yhangmoq gi, "Nga-nhúng haí jung saksé wá râ nyi ashî lúhú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luí,

² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haú Hkrisduq nghû é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lúhú?" ga myi jáng, Yesuq gi, "Nàng taí é eq rajung za nghut lhê." ga tú taí ri.

⁴ Pilat gi, "Shí yuq lé hûn râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôlhang, haú bang gi, "Shí yuq gi, Yuda mau gón má yhang mhoqshít é dông mai, mingbyû wui é i-myít lé shuí gabyông ri. Haú gi, Galile mau mai ahkuí shî má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri.

⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhum lhum kut shit râ lé, wó myâng shoq ga, myit myoqbyu nyi é nghut luî, Yhang lé myàng nau é gyai yhang myáng bê nghut ri. ⁹ Haû mù, yhang gi, Yesuq lé dangmyi myo myô èq myî wú kôlhang, Yesuq gi, dang rahkun lhang a tú taí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoî jihkyoî kut mù, atam é dông taí hpoî kô luî, réng é mebu hut byi mù, Pilat chyáng dum taû dé nhang kat akô. ¹² Haû nyí jáng, hí hpyang gyè dut lhûm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39—19:16

¹³ Haú hkûn, Pilat gi, hkyangjong agyi pé eq zau suwún wuî, mingbyû wuî lé wut tsing to mù, ¹⁴ "Shí yuq gi, mingbyû wuî lé hkyô shuî nghoq ri ga, Yhang lé nungmoq ngá chyáng shuî lé lô bekô. Ahkuî, wú keq, nungmoq é hí má, Yhang lé ngò myî wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mô, shí yuq lé nga-nhûng chyáng dum dé kat byi bê nghut ri; haû mù luî, wú keq, shí yuq gi, shî gíng é mara haî le a kut shut nghut ri. ¹⁶ Haû mù, ngò, Yhang lé dam byi luî, nhang pyám râ." ga luî, yhangmoq lé taí ri.

¹⁷ Nghut kôlhang, Lhoqlhai Poî hkanmó má, Pilat gi, mingbyû wuî lé htongbyû rayuq yuq nhang kat byi byi kut é yanmai, ¹⁸ yhangmoq banshoq

bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô. ¹⁹ Barabaq gi, wà htum má gumlau kut é eq byù sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq taí ri. ²¹ Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garû nyi bum akô.

²² Haû mù luí, sum dâm nghû râ hkûn, Pilat dum taí é gi, "Haí mù luí l hú? Yhang gi, hai mara kut shut bê l hú? Yhang má shî gîng é mara lé ngò a myàng, haû mù, ngò, Yhang lé bat, nhuq, mhoqshit luí, nhang pyám râ." ga luí, yhangmoq lé taí ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taí ung yù bekô nghut ri. ²⁴ Haû mù luí, Pilat gi, yhangmoq dúng é eq rajung za myit hpyit doqdan byí ri. ²⁵ Haû su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luí, Yesuq htâng má châng nhang akô. ²⁷ Byù rajùm rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuì le haú má bo tô ri. ²⁸ Yesuq gi,

yhangmoq shut lêng wú luí, "Yerusalem byizo wuê ê, Ngá é yanmai hkâ-ngau nyi kó, nungmoq gi, yhumsing gung eq yhumsing é zo dù wuê é matú sheq ngau nyi keq. ²⁹ Hkâsu mù gâ le, 'Zogung a dut wú é eq naú a huq wú é baudung myhí pé gi, hkungsô wó nyi ri.' ga luí, taí é buinyi gi, jé lô râ nghut lhê. ³⁰ Haú buinyi má, byu pé gi, bùm pé lé, 'Ngamoq ahtoq má byoq nhé aq!'

ga luí le, kong pé lé,

'Ngamoq ahtoq má nghop aq!'

ga luí le, wut taí bùm bekô râ nghut lhê. ³¹ Byu pé gi, sikhâm jùm tô ashí le isu kut kô é nghut le gi, màn jáng gi, hkâsu wá dut lò râ lhú?" ga taí ri.

³² Haú hkûn, damyaq í yuq lé le, sat pyám râ ga, Yesuq eq rahá shuí htoq ló akô. ³³ Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô. ³⁴ Haú hkûn, Yesuq gi, "Âwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lhang, hkyîn shosé she é dông gam yu pyám byi akô.

³⁵ Mingbyû wuê gi, yap to mù tu wú nyi akô. Zau suwún wuê Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyîn yu é sù Hkrisduq nghut le gi; Yhânggung yhang le hkyi yu wú sháng gaq." ga akô.

³⁶ Gyezô pé le, huí ê mù, rhoí nyaú nyaú akô. Yhangmoq gi, chyîn wing lé yhun byi kôluí, ³⁷ "Nàng gi, Yudaq byu pé é hkohkâm nghut é nghut

☆ **23:30** Hos 10:8

le gi, Náng gûng yhang nàng, hkyi yu wú aq." ga Yhang lé tai akô.

³⁸ Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUFAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lhu? Haú Náng gûng nàng le, ngá-nhik lé le, hkyi yù aq." ga luí, Yhang lé rhoí ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luí nhîng, Garai Gasang lé a gyuq lhu? ⁴¹ Nga-nhik gi, yhumsîng kut shut é mara eq rajung za, jéyáng hui zo gîng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

⁴² Hau htâng, yhang Yesuq lé tai é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za tai lé, hkû-nyí yhang nàng Ngò eq rahá hparadisu* má nyí râ nghut lhê." ga luí, yhang lé tâ tai kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luí, myinhtâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq

* **23:43** Hparadisu nghu é gi, mauhkûng mingdán lé tai ri.

† **23:44** Nga-nhûng é nyí káng raxe í hkyíng gi, Yudaq byù pê é napkyô hkyuq hkyíng nghut lhê; yhangmoq é gau hkyíng gi, nga-nhûng é myinhtâng sum hkyíng nghut bê.

yhûm mâ é pán-gyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Áwa ê, Ngò, Ngá é woi-nyí náng é loq má ap byî lê." ga htê mó eq garû kat ri. Haú su ga ban taí eq, Yhang kâng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri.

⁴⁸ Haú hkyô lé wú râ ga, lé zîng tô é byù lunglhang bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô.

⁴⁹ Nghut kôlhang, Yhang lé sê é bang eq Galile mau mai Yhang htâng châng é myiwe wuì gi, we we má yap to mù, haú hkyô pé lé byu wú nyi akô.

*Yesuq É Màng Lé Lup Hkaú Má Kat É Hkyô
Mht 27:57-61; Mrk 15:42-47; Yhn 19:38-42*

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luí, ⁵¹ yhang gi, Yudaq uphkâng hpúng mâ é rayuq nghut kôlhang, hpyé lhûm é hkyô má le, zui saí é hkyô má le, myit a bo huí lom é sù nghut ri.

⁵² Yhang gi, Pilat chyáng wàng luí, Yesuq é gungsôm lé dúng yu ri. ⁵³ Haú mù, gungsôm haú lé tapzîng mai hkyut hkyô yù luí, pán yúng eq htup yup mù, ó lé lhang a kat wú shî é, luqgok lé kyûng tô é luqgok lup hkaú má kat tô ri. ⁵⁴ Haú nyí gi, Hên Lajang Buinyi nghut luí, Bánno buinyi jé râ za nghut bê.

⁵⁵ Galile mau mai Yesuq eq rahá htoq lé lo é myiwe zo wuì le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô

é lé, ê myang akô. ⁵⁶ Hau htâng, yhangmoq gi, yhûm shut taù lò mù, Yesuq é gùng sôm lé but byi râ matú, namngón é jung eq mura xù lé hen tô akô. Bánno buinyì má kúm gi, tarâ joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyì htang napsûn noq le, myiwe wùi gi, yhangmoq hen tô é namngón jung pé lé yu chûng mù, lup shut e ló akô. ² Yhangmoq gi, lup mâ é luqhkum lêng bóng to lánng é lé, ê myâng kômù, ³ wang e wú kô le, haù Yhumsîng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô. ⁵ Haù mù, myiwe haù bang gi, gyuq dan bum kôluì, myigùng shut myoqdong ngóm gop tô bum é u lé, haù nhik gi, "Nungmoq gi, duì sù lé, shi to bâng chyáng haì mù ho nyi akô lhú? ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé, ⁷ 'Haù Byu Yhangzo gi, yubak dap bâng é loq má ap pyâm é hui luì, tapzîng má jén sat to huì é htâng, sum nyí nghû é buinyì má lhoq dui toq yu é hui râ nghut lhê.' ga nungmoq lé taì tô é dang lé myit bun keq." ga luì, yhangmoq lé taì ri. ⁸ Haù hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taù lò mù, lagyo raxe rayuq eq gotû lhunghâng bang lé, haù hkyô

banshoq lo taî kyô akô. ¹⁰ Lagyo pé lé lo taî kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô. ¹¹ Lagyô pé kúm gi, yhangmoq é dang lé dangsôm su ngam pyám kôluî, a jíng byi kó nghut ri. ¹² Nghut kôlhang, Petruq gi, toq luî lup má din jé ê mù ngóm wú kat le, mâng htup é pán leq tô é lé za myàng mù luî, haû su dut é hkyô lé maú é eq, yhûm shut dum taû ló byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haû ra-nyí má za, Yesuq é chángzô pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô. ¹⁴ Yhangnhik gi, dut laí ló é hkyô pé banshoq lé, rayuq eq rayuq taî lhûm nyi akô. ¹⁵ Yhangnhik gi, haû hkyô pé lé rayuq eq rayuq taî hpyê lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhang, yhangnhik gi, myoq hpuq hpuq pyám byî é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang taî lhûm lé lo é gi, haí jung wá nghut akô lhú?" ga myi kat jáng, yhangnhik gi, myoqdong shûm kut luî, hkyíng yap tô akô. ¹⁸ Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyî luî nhîng, shí gyoro lé haû wà má dut lo é hkyô pé lé, a sê é bíng gi, Nàng baú za wá nghut lhê lhú?" ga myi kat ri.

¹⁹ Yhang gi, "Haí jung lhú?" ga dum myî é hkûn lé, yhangnhik gi, "Nazaret wà byù Yesuq é hkyô

nghut lhê; haú yuq gi, Garai Gasâng é hí má le, byù lunglhang bâng é hí má le, nhut shô hpaqchyî a-tsam eq hkyî loq a-tsam má wum-o bo é sù myiqhtoi nghut ri. ²⁰ Nghut kôlhang, hkyangjong agyi pé eq ngamoq é zau suwún wui eq haú yuq lé sat pyám râ matú ap byî pyám kômù, yhangmoq gi, Yhang lé tapzîng má jén sat pyám bekô nghut ri. ²¹ Ngamoq kúm gi, haú yuq lé, Israelaq byù myû lé hkyi yù râ sù nghut lhê nghû luî, myit myoqbyu nyi bum lhê. Nghut kôlhang, haú su dut laî ló é gi, hkû-nyî sum nyî lhang bò bê. ²² Hau htoq agó, hkû-nap noq le, lup má é wú é, ngamoq hpúng má é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taû lò mù, 'Haú Yhumsîng dui nyi ri.' ga luî, taî kyô é maumang lagyo htoq shit é shing-rán lé, myang é hkyô lé lo taî kyô akô. ²⁴ Haú mù, ngamoq é luzúm wui ra-am gi, lup má é wú kô le, myiwe wui taî é eq rajung za, dut to lánng é lé é myàng akô. Nghut kôlhang, haú yuq lé gi, yhangmoq a myàng kó gâ." ga luî, Yhang lé taî kyô akô.

²⁵ Haú hkûn, Yhang gi, "Myiqhtoi pé taî é dang banshoq lé lumjîng râ matú, hpaqchyî a bo é eq ngha é sù nhik é, ²⁶ Hkrisduq gi, haú su é wuîhke jamjau hkâm zô yu é htâng má sheq, Yhâng é hpungwup shingkang má wó wang nyi to râ, a nghut kó lhú?" ga luî, yhangnhik lé myî ri. ²⁷ Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taî hpông kyô ri.

²⁸ Ahkuî, yhangmoq, haú nhik e ló é wà má

chyâng lò kôjáng, Yesuq gi, laî lô râ su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luî, Yhang lé wum kat chôm lung nyi akô. Haú mù luî, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luî, jeju hkya-on mù, myhik hpé luî, yhangnhik lé gàm byî ri. ³¹ Haú hkûn, yhangnhik é myoq bóng lô luî, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, "Yhang gi, hkyô má ngá-nhik eq dang nyo lhûm é eq Chyúmdang é lichyúm taî hpóng shit é hkûn, ngá-nhik gi, i-myt unghkaû má, achyí aku dut bê a nghut lhú?" ga luî, yhangnhik yhangchang taî lhûm akô.

³³ Yhangnhik gi, toq mù, radá dâm Yerusalem wà mó shut dum taû lô kô le, lagyo raxe rayuq eq, yhangmoq eq rahá nyi é bang zup míng to kô é lé lô myang akô. ³⁴ Haú bang gi, "Haú Yhumsîng gi, teng za yhang dum dui toq lô bê; Simun lé lhang htoq shit bê nghut ri." ga taî lhûm nyi bum akô. ³⁵ Haú hkûn, yhangnhik gi, hkyô má dut laî lô é hkyô pé eq, muk hpê é hkûn má Yesuq lé bûn sé kat é hkyô lé, taî kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taî nyi tô bum ashî le, Yesuq gi, Yhang gûng yhang, yhangmoq é

agùng má yap to luî, "Nungmoq nguingón yuqyo nyì sháng gaq." ga luî, yhangmoq lé taî ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô.

³⁸ Haû mù luî, Yhang gi, "Nungmoq gi, haî mù dan nyi bum akô lhú? Haî mù nungmoq é i-myit unghkaû má úng-âng nyi bum akô lhú? ³⁹ Ngá é loq eq Ngá é hkyî lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luî, yhangmoq lé taî kyô ri.

⁴⁰ Yhang gi, haû su ga taí mù, Yhâng é hkyî loq lé tûn shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luî, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rahtung lé, byî akô. ⁴³ Yhang gi, haû lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taî é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luî kê to má kê to banshoq gi, dik rá chyat nghut lhê nghû luî, nungmoq eq rahá nyi to ashî hkûn lé, Ngò, nungmoq lé taî kyô tô é pé gi, shî nghut bê." ga taî ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byî ri.

⁴⁶ Haû mù, Yhang gi, "Hkrisduq gi, wuîhke jamjau hui zo mù, sum nyí nghû râ buinyì má, shi é mai dum dui toq lô râ hkyô lé le, ⁴⁷ Yerusalem wà mó mai hî luî, byù myû chângjup lé, Yhâng é mying lé lang luî yubak mara hkyut pyám byi râ hkyô eq

myit lhîng râ hkyô lé le, hko kyo râ hkyô lé, kê to bê nghut ri. ⁴⁸ Nungmoq gi, shí pê é saksé pé nghut nyi akô. ⁴⁹ Ngá Wa byî tô é danggidiq* lé, Ngò, nungmoq é ahtoq má nhang kat râ nghut lê; nungmoq kúm gi, htoq tsáng myhâng mâ é wum-o a-tsam wó yu é buinyî jé shoq, Yerusalem wà mó má láng nyî keq." ga luî, yhangmoq lé tai ri.

*Yesuq Mauhkûng Shut Shuî Toq Yu Huî É Hkyô
Mrk 16:19-20; Lagyo 1:9-11*

⁵⁰ Hau htâng, Yhang gi, yhangmoq lé Behtani wà yàm shut shuî htoq ê mù, Yhâng é loq tu toq luî, shimân byî ri. ⁵¹ Haû su kut shimân byî nyi ashî le, Yhang gi, yhangmoq chyáng mai gâng ló byuq luî, mauhkûng shut shuî toq yu é hui bê nghut ri. ⁵² Yhangmoq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû ló akô. ⁵³ Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

* **24:49** Ngá Wâ byi tô é danggidiq nghu é gi, Chyoiyúng é Woi-nyi lé tai ri.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

cxli

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee